

東
華
續
錄

東華續錄

同治十一

臣王先謙敬編

臣張式恭恭校

秋七月癸未諭議政王軍機大臣等勝保奏豫境回竄粵賊逐漸南趨派兵追剿並親督大軍策應及憑陳於苗沛霖一事專主撫議爲局外人所不見諒恐勝保西行撫馭失宜致兆亂萌各摺片粵賊竄回豫境業由裕州葉縣一帶南竄勝保所派副將王佐臣一軍已由鄆城舞陽追剿著鄭元善督飭兵勇併力殲除勿令闌入楚境致剿辦又煩兵力勝保見擬督隊取道項城商水節節前進著將豫省腹地迅速廓清馳赴洛陽駐紮俾捻匪不敢再行出擾則豫省西陲益臻穩固勝保如慮西行後不能兼顧皖事恐楚軍與苗練構釁收拾愈難李續宜身爲皖撫苗練皆係部民豈肯

意存岐視苗沛霖如協助官軍始終不懈李續宜豈得無故加兵如反覆無常不受鈐束不但李續宜督兵進剿卽勝保在皖亦應聲罪致討況苗沛霖所遞僧格林沁稟詞業經奏聞將來辦理此事必不至偏枯也另片奏擒首馬振興率領本圩及阜陽縣屬之韓馬莊等二十寨乞降並有不期而薙髮投誠者二十二寨新蔡之路節次漸通勝保察其情形無虞反覆准令投誠隨營效力各等語勝保於馬振興等投誠後令其揀選丁壯剿賊立功方准發給口糧且不遽爲馬振興等奏請予以官職辦理甚合機宜仍著勝保畱心察看該擒首等如果真心歸化自應予以自新之路如係畏懼攻剿暫投該大臣軍前乞命尙存反覆之心則仍當及早翦除不可稍涉大意周家口釐局竟被土匪楊元率眾滋擾自應從嚴懲辦惟委員等有無侵漁加派亦應嚴切根究庶足服商民

之心而杜土匪之口將此由六百里各諭令知之○諭勝保奏苗沛霖立功已有成效尙懷疑懼該大臣見奉旨西行未能兼顧皖事恐離皖之後有人挑釁或致意外之虞等語勝保見在取道項城商水一帶西剿粵賊前因豫省河洛喫緊屢諭勝保統兵前往駐紮勝保起程以後卽應責成李續宜接辦苗沛霖在皖如果恪遵約束諒該撫必不阻其自新之路儻仍有跋扈情形李續宜自不能置之不辦該撫平日議論並非專意剿苗惟勝保離皖以後苗沛霖總不免心懷疑懼自應予以羈縻加以鈐束一切操縱機宜僧格林沁惟當與李續宜妥密籌商聯絡一氣餘著仍遵前旨相機辦理據實迅速覆奏將此由六百里諭令知之○諭都興阿等奏周家圩港居民與洋人爭鬪一摺已將參將李潤雄革職總兵李德麟摘頂示懲矣洋人於未通商各口岸例不准其前往銷

貨何以李德麟稟內稱近來每有奸商勾雇洋人滙來內江各港
銷貨之語既有此等情事卽應早爲稟明禁止何以直至周家圩
港滋事之後始行稟聞該總兵等平日全不以營伍爲事其咎實
有應得惟此次洋人既係甯波奸商勾引自知情虛赴水淹斃何
以連次到有輪船既捉去民人三名復燒毀紅單船三隻是其兇
橫情形實出情理之外不可不嚴加詰問使洋人知所儆懼此次
起釁根由如全係洋人理曲固不必代爲隱飾如曲在洋人而內
地官民亦居其半聲敘亦必須真實無僞方足以折服其心著會
國藩都興阿李鴻章確切查明具奏不可一字虛假本日已飭總
理各國事務衙門王大臣將該洋人違約妄行各情告知該國在
京公使與之理論並著薛煥在滬先行妥爲查辦該洋人滙上紅
單船將礮門釘塞該船兵勇所司何事著都興阿嚴飭管帶各員

認真整頓於賊匪則痛加剿捕於商民則妥爲保護於外國洋人則分別是否通商地界有無執照防範之中示以撫綏以期相安於無事儻再不善籌維不知振作必將管帶各員從嚴治罪將此由六百里各諭令知之○甲申諭內閣朕奉 慈安皇太后 慈

禧皇太后懿旨前因雲南學政張錫霖奏請宗祀 文宗顯皇帝

於 大饗殿以合孝經明堂之義並附陳宗祀辨疑條說當交王大臣大學士六部九卿翰詹科道敬謹妥議嗣據該大臣等會同議奏以窒礙難行懇請毋庸置議復以事關典禮理宜倍切詳慎本日召見惠親王綿愉惇親王奕諒醇郡王奕譞鍾郡王奕詒孚郡王奕誨禮親王世鐸睿親王仁壽肅親王華豐順承郡王慶恩軍機大臣文祥寶鋆曹毓瑛御前大臣景壽奕山貝勒載治貝子載容公載岱大學士賈楨周祖培尙書瑞常朱鳳標倭什琿布大

學士銜尙書祁駕藻尙書萬青藜綿森大學士銜管理工部事務
翁心存尙書倭仁侍郎張之萬阜保大理寺卿全慶光祿寺卿潘
祖蔭等面加詢問敘稱 文宗顯皇帝德齊覆幬 道隆繼述凡
有血氣之倫罔不共切尊崇矧在臣工渥承 厚澤惟考之今制
稽之古禮事多窒礙未可依行等語仰惟 文宗顯皇帝知禮善
述於 御極之初特頒 諭旨嗣後 郊祀配位總以 三祖
五宗爲定垂示久遠著爲成式今舉行宗祀明堂之典仍是 郊
壇配饗揆諸 文宗顯皇帝垂憲萬世之心殊多未愜且乾隆年
間奉 高宗純皇帝諭旨改大饗殿爲 祈年殿 列聖龕位儼
然在上若於季秋之月大饗 上帝禮隆獨配於 文宗顯皇帝
在天之靈更有所不安至孝經嚴父之說 聖祖仁皇帝欽定孝
經衍義辨晰至當深以迭饗並侑爲失禮之甚 謨烈昭垂曷敢

不欽承無斃雖至孝莫大乎 尊親而崇祀必求諸典禮該學政
所奏既屬窒礙難行卽著毋庸置議繼志述事孝之大者皇帝惟
當仰承 先志恪守彝章爾王大臣等其各矢公忠釋思 謨訓
遇有事關國計民生者事事以 先帝之心爲心盡心匡弼用協
厥中則 在天之靈必能降鑒無俟紛更典禮爲也將此宣諭中
外知之○諭張亮基奏代遞在籍京員封事一摺湖北在籍刑部
主事王柏心進呈經論及應詔陳言各一摺言皆忠告具見惓忱
所呈伊訓及太甲要語經論八首卽著弘德殿存記以備乙覽其
應詔陳言八條內所請開特科寬權算二條該部妥議具奏其餘
六條分別內事外事所言亦多可採著畱中備覽○諭議政王軍
機大臣等張亮基奏林自清赴渝謁見經該前督嚴加開導尙無
悖逆之意已將所帶不遵約束之遊擊張正洪等正法並將提督

印信勒令呈繳惟其勢萬難回滇擬咨商駱秉章暫畱林自清在川剿賊等語林自清既與雲南回眾不能相容若畱川效力必須將所部亡命之徒悉數遣回庶不至貽後患著駱秉章潘鐸張亮基等仍遵前旨如林自清畱川剿賊不至爲患卽當酌籌款項將其黨與悉數遣回或酌畱數百人使之帶以立功如林自清因兵練已撤仍願隨同張亮基赴滇卽著張亮基將其帶往不得任令擁眾獨行以致騷擾地方其張陞一軍應如何安插之處亦著駱秉章張亮基等妥爲辦理將此由五百里各諭令知之○諭英蘊等奏喀什噶爾突有賊匪撲入卡倫官兵迎剿獲勝奎英等奏安集延賊匪突入卡倫撲至回城外滋擾官兵出剿獲勝各一摺據稱探得爲首賊匪係倭里罕及斜黑阿渾二子見飭嚴防等語倭里罕係屢次入卡滋事著名首犯而斜黑阿渾二子又屬逆裔該

匪等膽敢狼狽爲奸糾約匪黨攻撲回城抗拒官兵實屬目無法紀雖經官軍擊退難保不再來滋擾著奎英等實力防範如探有匪蹤卽行追擊以期淨絕根株奎英等摺內所稱另股賊匪係屬何賊而英蘊及奎英等摺內又牽及浩罕互鬪之事聲敘殊未明晰並著查明具奏景廉等著仍遵前旨迅卽赴任飭令各該城認真防守伊犁換防官兵見已到境是否足資堵禦並著飭令認真接捕以清餘孽常清等有統率各城之責何以於邊卡滋事毫無聞見卽著查明具奏並嚴飭該城妥速藏事勿任滋蔓另片奏葉爾羌伯克邁瑪特哈色木身故所遺世職驗看得伊之嫡次子堪以承襲等語該伯克有無嫡長子未據聲敘著再查明奏請承襲無稍含混又據英蘊等奏請將賞給浩罕伯克敕書等件暫緩頒發等語浩罕伯克邁里既據探稱被屬下謀弑地方荒亂所有前

頒敕書紳段等件著暫存葉爾羌公庫俟秋後探明確情再行頒給將此由五百里各諭令知之○丙戌諭議政王軍機大臣等勝保督辦皖豫軍務所有豫境賊匪自應統籌埽蕩該大臣所派副將王佐臣管帶馬隊已由鄆城舞陽進剿其太和一路亦經該大臣畱兵鎮守前諭將盧泰所帶兵勇五百名調回交黃元吉管帶以厚兵力諒已足敷防剿見在陝省回匪鴟張雖已嚴飭多隆阿等軍馳往援剿第恐該回匪等勾結捻逆入陝則更形棘手勝保前奏親統馬步及項城兵勇七千餘名卽著迅速督赴河洛俾各捻無從牽擾秦豫兩省得以迅速蒞事庶於大局諸多裨益其由太和至河洛一帶如何情形並著詳細覆奏將此由五百里諭令知之○諭李績宜奏疊奉諭旨遵籌密陳一摺苗練借剿賊爲名忽降忽叛若不急圖剿除則中原大局後患尙多該撫見在先解

散黨與以孤其勢卽著酌量辦理該練所占民圩甚多並未甘心服從若示以順逆曉以禍福歸順者妥加撫綏怙惡者逐漸勦辦必可次第反正該撫熟悉情形應如何辦理之處不爲遙制並不責以旦夕之效惟苗沛霖被偪寫迫窮而思竄亦在意計之中前據該練遞稟於僧格林沁經該親王具奏僧格林沁公正樸誠卽使該練往投必能措置合宜惟該親王遠在豫省於苗練狡展皖軍布置各情未經深悉著李續宜隨時籌商以期互相聯絡勝保已飭赴河洛之交皖事無虞掣肘惟多隆阿一軍見困陝省漢回互關擾及西安同州恐勦辦尙須時日更恐陝省事竣金陵尙待其協勦北路藩籬僧格林沁止能顧及虞永一帶而光固等處該撫均當豫籌杜其奔竄勝保性好浮夸鄭元善材非遠到均恐不能堵禦總當計籌萬全不至激變目前亦不可釀患日後方爲妥

善袁甲三在臨淮督師久無成效萬難勝此重任見尙未准開缺
將來朝廷自有權衡該撫於臨淮各軍先行隨時察看再候諭旨
該撫咯血之證在營調攝自當漸痊卽著將辦理情形隨時具奏
原摺著畱覽將此由六百里密諭知之○諭寄諭欽差大臣僧格
林沁李續宜奏遵旨密覆辦理苗練情形一摺據稱苗沛霖張落
刑兩逆首積不相能惟操之過蹙難保不勾結爲患見將苗沛霖
黨與陸續解散幾及其半擬俟苗勢旣孤再審量緩急次第辦理
等語覽李續宜所奏其於苗練一事並非一意主剿但苗沛霖勢
燄日熾不受地方官鈐束自應散其黨與以後或剿或撫始可以
操縱自如苗沛霖果馴順輸誠督率練眾會同官軍進攻逆捻則
該大臣攻擣永毫無巢正藉苗練牽制之力以清疆圉李續宜亦
斷不肯無故加兵第恐苗沛霖見其黨與日散楚軍日盛而勝保

又已前赴河洛難保不心懷疑懼或挾眾北趨徑投該大臣軍營
申訴務當妥爲駕馭或令酌帶練勇勦擒立功由該大臣察看情
形斟酌妥辦朝廷亦不爲遙制惟苗沛霖性情狡猾仍當隨時防
範不可稍涉大意李續宜見駐六安相距雖遠第旣與該大臣同
辦皖北軍務所有軍情變幻及勦撫機宜務須彼此函商以期和
衷共濟庶不至辦理參差將此由六百里密諭知之○諭寄諭欽
差大臣袁甲三前據勝保奏丁潮臣因臨淮之兵攻勦日急該練
悉眾譁歸約有二萬餘人當以該練眾胸懷憤激勢必乘怒很鬪
諭令袁甲三妥爲防範不可疏虞該練眾回巢以後會否接仗如
何辦理情形尙未據該大臣奏到苗沛霖因該大臣與李續宜合
力勦苗特嗾其黨丁潮臣乘機生變藉以牽掣而不居其名其計
甚狡該大臣務當商同李續宜厚集兵力將此股回竄匪眾悉數

殲除不可任令蔓延爲患勝保起程以後一切辦理苗捻機宜事
權固可歸一惟苗沛霖心懷疑懼持之太急恐與張落刑句合則
北路空虛不無可慮該大臣惟當與李續宜妥爲籌畫以期計出
萬全該大臣前此因病陳請開缺諭令候旨見在苗捻未平臨淮
軍務緊要該大臣惟當與李續宜共矢公忠努力幹濟不可存五
日京兆之心致負委任將此由六百里密諭知之○丁亥諭議政
王軍機大臣等景紋奏行抵川省籌備餉需並在川接滿慶等咨
報情形各摺片據稱見在西藏僧眾互相殘殺駐藏官兵不足以
資彈壓請飭川省暫爲湊銀數萬兩以備餉糈並調撥番漢官兵
揀派文武幹員隨同前往等語前據滿慶等奏藏中僧俗鬪殺不
休當經諭令駱秉章由川酌調妥幹官員及兵丁數百名交景紋
管帶赴藏如川省兵力未能分撥卽咨行景紋酌調達木蒙古官

兵及夥爾三十九族番兵就近帶赴並諭令景紋於抵川時與駱秉章籌商將所調兵丁迅速帶往見在景紋已抵川省著駱秉章督飭藩司湊集銀數萬兩以備餉需軍火之用如一時或形支絀卽著先備若干解交餘再源源接濟並揀派能幹文武數員隨同景紋前往彈壓辦理並著景紋迅卽調齊番漢兵丁馳赴藏中相機籌辦及早竣事並仍遵前旨查明此案起釁根由秉公剖斷滿慶等有無徇情濫保情弊亦著查明切實具奏毋許瞻徇將此由五百里各諭令知之○戊子諭內閣鄭元善奏官軍攻克平輿集並堵擊粵匪剿辦洛郡逆練各情形一摺汝營官軍連克二王樓等處賊寨後乘勝進擣平輿將出隊抗拒之賊轟斃多名焚毀老巢附近各卡越壕填圍而進短兵奮殺賊屍縱橫立將平輿集攻克其由徐寨竄扼河西之賊亦經官兵擊退各軍見由平輿直偏

該逆老巢著鄭元善督飭兵勇務將逆首陳大濬等悉數殲擒毋任漏網其由宛屬竄撲泌陽圍攻桐柏縣城粵匪經知縣溫逢春等擊退由鄖西退入豫境之賊在淅川內鄉一帶掠鄉攻城均經該地方官擊敗復乘雨圍攻新野縣城竄入唐縣境內屢經該縣團勇擊退著鄭元善迅飭各路官兵會合鄉團隨處兜剿毋令紛竄至洛陽縣會元局團匪李書聲等抗官劫餉約期攻城既經副將楊長春將匪首擒獲正法著鄭元善卽飭令該地方文武將會元局一帶團練軍械悉令繳官並令速完錢糧如再抗違卽行從嚴懲辦以儆刁頑○鄭元善奏屢據張曜等稟報汝軍屢捷之後連日滾營進紮查勘平輿集爲汝東巨鎮集之正西一里許有謝莊賊壘一處集之西南三里許有陳大濬輒寨一處而輒寨尤爲堅巢六月十九日該匪乘我軍築營由謝莊突出攻撲各營排隊

迎勦斃匪多名賊退入壘張曜挑派精銳卽於是夜銜枚疾趨直撲謝莊連拋火彈噴筒壘內火起匪眾大亂都司鞏玉林督勇越壘斃賊不少餘匪逸竄統計殺賊八九百人我軍卽分兵進駐謝莊二十五日張曜派兵出隊賊由平輿集及附近之徐范等寨蠢擁抗拒張曜飭步隊由中路進壓馬隊分左右包鈔該匪列陣未定驟被轟擊立殲多名紛紛敗奔我軍併力緊蹙沿途疊有斬殺參將袁懷德隨將附近賊卡縱火焚毀敗賊向平輿集竄歸張曜督催馬步直逼平輿我軍填濠吶喊一鼓作氣遊擊徐連升越圍而進知縣湯聘珍余兆達率軍繼之奮勇砍殺賊屍縱橫卽於是日未刻將平輿集攻破餘賊奪路狂奔遁入輒寨老巢其時徐寨續出馬賊數百名竄扼河西意欲斷我歸路遊擊周明崑策騎馳勦擊斃悍匪甚多餘賊竄歸張曜激勵各軍由平輿直撲老巢會

同副將巴揚阿參將李殿元等輕騎環寨而馳查看老巢輒砌高
堅重濠重閤守賊憑壘抗拒礮石如雨未能馳兵肉薄應卽設法
攻取以期得手其洛陽境內之會元局圍練李書聲等糾集肆搶
且有勾通內應約期攻城情事副將楊長春設法弋獲訊明後就
地正法餘黨悉行解散至宛屬竄匪雖經兵團屢捷尙未大受懲
創臣與勝保毛昶熙派撥各軍均由南陽鎮總兵圖塔納統帶分
路進剿當可痛擊洛郡逆練已除首惡相機鎮撫卽易蔽事見在
西路情形稍鬆而宛南正形喫緊應請飭下勝保親督馬步剿辦
宛屬竄匪以杜髮捻勾結 上諭議政王軍機大臣等汝郡老巢
壕壘高堅深闊見經張曜等查看自應得其要領著鄭元善督飭
張曜等務乘銳氣迅速攻拔毋稍延宕捻首陳大濬等前經勝保
鄭元善奏稱嚴定章程准其投降曾經諭以陳大濬等爲汝郡著

名逆首稔惡已極不准收降此時進攻該逆老巢務將渠魁殲獲並附近徐寨等匪巢一律剷洗其附從餘黨及被脅民圩仍當分別剷撫酌量解散洛郡逆練首惡已除仍飭楊長春所畱兵勇妥爲鎮撫毋致再生事端至宛屬竄匪疊撲泌陽桐柏縣城率其醜類肆行衝突著勝保仍遵前旨馳赴洛陽扼要駐紮飛飭派出之王佐臣一軍探賊所向迎頭截擊其參將盧得勝等所帶豫軍著飭令與之會合併力夾攻痛殲醜類毋得任令肆行無忌或與捻匪勾結爲患滋甚楚省道員歐陽正埔及周鳳山等所部自信陽前進正可會合堵剿該大臣等卽飭各軍聯絡聲勢互相兜擊陝省回匪勢張著鄭元善卽飭縣丞張寶禧所部速卽前往所有截畱該軍營陝甘兵四百名亦卽抽換遣回隨時具奏將此由六百里各諭令知之○予山東殉難學政馬鴻基祭葬世職○己丑諭

內閣見當溽暑炎蒸南中尤甚僧格林沁以蒙古藩王親統三盟馬隊馳驅皖豫之交與士卒同甘苦每一念及厯系倍深著派該大臣之子伯彥訥謨祜馳驛前往省視並賞給黃辦珊瑚豆大小荷包各一對白玉珮一件帽緯二匣大卷紗袍料二件小卷紗馬褂料二件卽著伯彥訥謨祜親齋前往交該大臣祇領以示軫念戎行優禮蓋臣至意○諭袁甲三節次奏稱病勢增劇懇恩開缺等語袁甲三著准其開缺回籍調理前因壽州失陷袁甲三與翁同書同辦一事且有督辦軍務之責降旨交部嚴加議處當經吏部議以革職惟念該大臣督辦安徽軍務時閱三載雖未能卓著戰功而時值艱危竭力支持一切尙臻穩練該部所議袁甲三應得革職處分著加恩寬免○諭議政王軍機大臣等成明奏統率京兵過河出隊日期並同郡回匪情形一摺前瑛榮等奏報蒲城

危急情形疊經諭令該署提督先其所急統率全軍剋日拔營渡河先解蒲城之圍相機勦辦著仍遵前旨卽會合同郡兵勇併力進攻以蘇民困而解倒懸毋稍延緩前諭成明以京兵未便孤懸深入非謂附近地方亦可概置不顧也楚軍由陝省南路入援勢將先顧省城未能徑抵同郡成明並當於迅解蒲城圍後俟楚軍到陝互相聯絡會商進勦潼關防兵尙敷扼守鄭元善已飭縣丞張寶禧統剛銳兩營入陝隨勦著瑛榮於豫軍馳抵潼關後先行撥赴同州爲成明聲援以厚兵力並著探明楚軍行抵何處速行催提以資攻勦京兵渡河以後並著英桂於沿河要隘地方督率防兵嚴密扼守並籌撥援兵接濟餉需毋稍貽誤至多隆阿一軍前據該將軍奏稱於五月初十等日由皖兼程赴陝迄今將及兩月尙無到陝信息疊諭官文多隆阿嚴催前往乃竟無一語覆奏

迴出情理之外陝省情形危急益甚該將軍若再逗畱觀望延不赴援致誤大局自問當得何罪官文前奏撥兵援陝尙能不分畛域何以多隆阿一軍久不催令前進僅爲防堵粵捻竄犯楚邊之計置陝省危急於不顧儻陝省稍有疏虞必治官文多隆阿等以貽誤軍情之罪毋謂前功可恃得以仰邀寬貸也將此由六百里各諭令知之○諭前據僧格林沁奏移營夏邑勦辦永亳捻圩請俟秋高氣爽剋期大舉當經諭令隨時酌度嗣據奏稱所統馬步數千名將來節節進勦兼顧不遑見勝保袁甲三李續宜鄭元善毛昶熙各路馬步兵勇約有數萬一俟秋高氣爽應由西南兩路併力而進江北一帶可期肅清等語所奏通籌全局實爲有見捻匪盤踞蒙亳疊擾東豫實爲中原大患自僧格林沁督師南下屢挫賊鋒該捻不敢北竄見在攻克金樓軍威甚振自應節節進勦

肅清巢穴惟該大臣所統馬步本止兩萬分撥各處防剿統帶不
過數千提軍深入止能顧及北面一路而西南兩路若不併力進
剿必致乘虛紛竄李續宜身任皖撫於蒙亳情形自能通籌策應
袁甲三業經准其開缺所統臨淮之師約有二萬著李續宜畱心
察看兵勇可用者若干將弁得力者何人俟大舉之時派令由懷
遠一帶進剿邳宿海沐爲賊氛出沒之區裏下河一帶完善地方
久爲賊所垂涎吳棠駐師清淮兵力尙不能厚著卽知會僧格林
沁撥兵併力埽蕩保全完善徐宿爲南北要衝田在田在彼督辦
恐其意存敷衍勢難堵禦該鎮被參各款尙未據僧格林沁等覆
奏著卽酌保一員接統其眾如兵力不敷並著李續宜於臨淮軍
內酌撥數千名統歸管帶以資攻剿吳棠兵力旣單如僧格林沁
不能撥兵援應並著李續宜於臨淮軍內酌撥協助免致臨時掣

肘鄭元善進勦平輿見已克復著豫籌兵勇數千名隨同進勦毛昶熙近在歸德或直擣亳州或旁趨鹿邑著與僧格林沁商酌辦理鄭元善毛昶熙於屆時進止機宜著僧格林沁就近調度以期得力山東蘭嶧一帶應如何飭令德楞額等堵禦著僧格林沁豫爲調度正息信羅等處前據官文等奏飭派歐陽正墉等進勦能否於大舉之時派兵深入豫境著官文嚴樹森酌量妥籌多隆阿入陝後儻金陵已克自可畱於北路以壯兵威第聞捻圩半被裹脅疊聞官軍得手各處返正者頗多若明降諭旨無論苗練捻圩民圩其及時返正聽官約束者或蠲免錢糧數年量加撫恤出力紳民酌給獎敘如此刊刻謄黃徧行曉諭則自拔來歸者必多旣免致玉石不分以廣朝廷德意於進勦機宜亦覺事半功倍應如何降旨之處並著籌商具陳以上各情著僧格林沁與官文等妥

籌會商繪圖貼說密行陳奏餉需一節各該大臣等亦應豫爲籌畫庶兵到餉隨一鼓作氣迅奏膚功也僧格林沁若統師南下北路殊形空虛且以國家重臣馳逐於賊巢中尤深厯念屆時止可派員進勸該大臣仍在皖豫之交駐紮爲諸軍節度毋庸深入賊境用慰懸望將此由六百里各密諭知之○諭李續宜見以安徽巡撫兼欽差大臣勝保已赴河洛袁甲三亦已回籍於辦理苗捻各事更屬責無旁貸該大臣前奏苗練若操之過急恐其與張落刑句合見在苗練黨與解散幾及其半再緩數月苗勢必孤然後大中天討可見該大臣於此事已有成算在胸僧格林沁前奏緩攻苗練即可專辦捻匪自亦爲通籌大局起見惟遠在豫省於苗練實在情形及該大臣作何布置究恐未能深悉著李續宜隨時知照會同商酌庶辦理不至兩岐再另有旨令該大臣移紮臨淮

該處爲南北要衝惟距苗圩較遠皖西一帶有蔣凝學等軍是否足資統攝卽著酌籌具奏將此由六百里密諭知之○諭袁甲三奏病難再支懇請開缺並李世忠扼守石埠橋進攻九洑洲情形收復宿靈等處捻圩派兵進擣湖溝各摺片臨淮控扼長淮毗連徐宿最爲皖北要地李續宜前由六安進紮原爲督攻廬州此時廬州已克應否移軍進紮臨淮以資控制卽著妥籌進止李世忠性雖驕悍然材勇尙爲可用經袁甲三數載以來撫循激勵亦尙能盡其力見方籌攻金陵此軍於南北兩岸扼剿均甚切要前經諭令袁甲三飭令李世忠歸會國藩節制李續宜接辦後亦應妥爲駕馭將材難得當此用人之際諒該大臣等必能盡將將之道使之鼓舞樂爲所用並飭諸軍務與同心勦力毋或意見參差是爲至要和州駐馬河營盤經楊載福商明李世忠改歸楚師接防

原駐兵勇當經撤歸滁州諒必辦理妥協惟袁甲三以該營餉需久絀爲慮咨商吳棠妥爲接濟曾國藩前奏亦會有接濟李世忠營銀米等項想亦必隨時籌及兼顧也宿靈境內各圩歸正經袁甲三派員前往辦理其湖溝等積年捻巢已飭吳棠徐鵬等軍進剿一經得手即可與徐宿兵勇會合掃蕩即著李續宜督飭各員勦撫兼施務臻妥協其未到臨淮以前仍著袁甲三竭力籌辦不准稍存五日京兆之心致有貽誤侍講袁保恆仍著畱營歸李續宜調遣至袁甲三片內有甯國府城業經克復等語是否的實鮑超一軍作何調遣著曾國藩迅速具奏將此由六百里各諭令知之○命安徽巡撫李續宜爲欽差大臣督辦軍務○袁甲三以病免仍以吳棠署漕運總督○庚寅諭議政王軍機大臣等勝保奏遵旨移兵西進熟籌陝豫大局情形等語近日宛南髮捻逆匪奔

竄匿定洛陽爲中州名郡關繫緊要且該郡逆練雖經擒斬首逆
恐伏莽尙多必須駐紮大兵方足以資鎮撫勝保著仍遵前旨星
馳赴洛彈壓該地方練眾並豫防宛南竄匪乘間北來河洛既有
重兵皖豫捻逆不敢西窺秦晉既有一二股匪前來竄擾該大臣
足可居中調度遣兵四出擱擊所保全者不少陝省軍務自應仍
歸多隆阿督辦以一事權其宛屬竄匪仍著勝保飛飭派出之王
佐臣一軍馳往剿辦袁甲三軍營驍將無多張得勝爲臨淮必不
可少之將勝保部曲尙多健將據奏所部兵勇共一萬四千餘名
計已足敷剿辦張得勝一軍自應仍畱皖省剿辦捻逆毋庸調赴
勝保軍營至周口釐局前據勝保奏稱雜貨行頭楊元帶領匪徒
三百人赴局滋鬧並有尋犯毆官情事是楊元首惡已鑒鑒可據
何以紳商僉稱楊元並未在事難保非楊元恃眾作威迫脅該紳

商等呈遞稟函爲首惡開脫地步仍著勝保認真查辦毋致首犯漏網貽患將來將此由六百里諭令知之○李鴻章奏浦東一軍攻克曹涇鎮後六月十四日潘鼎新等營由曹涇進紮南沙距金山十五里潘鼎新等議以近城二里許賊營圍紮海塘攔路設卡左海右河若不力破此卡無由直薄城根會商劉玉林帶隊前往察看劉玉林見右河埂下賊樁攔處水尙不深遂同方有才等梟水而過掩至塹邊鼎銘二營繼至前後夾擊火器齊施延燒賊柵遂乘逆眾驚惶搶拔籤樁劉玉林等踰濠齊進賊首惡牆指揮被我軍迎面砍倒眾匪紛紛出竄斃於河海刀矛者無數城中大股來援復經擊退我軍回營後賊連夜修整營卡益以死守十七日潘鼎新令軍功潘鼎琛等率三成隊伍復攻此卡賊聞然撤退潘鼎琛等乘勝追至城下斬馘數十級我軍亦有傷亡正撤隊間南

門突出賊二千餘眾擁奔來我軍整隊徐退離城約五六里適潘鼎新等帶親兵三十餘人由三陽等處探視金山衛東北地勢猝遇賊眾見人數甚少直前兜裏劉銘傳槍斃騎馬賊目賊眾稍卻因令劉玉林移營進紮三陽賊遂盡逃入城十八日參將覃聯陞由奉賢帶隊亦到南沙十九日同都司胡鵬飛由海塘直抵城根賊於城外設伏誘戰覃聯陞偵知有伏飭令各哨勇丁按隊徐行當派守備陳德勝高振彪左右攻擊文清林周河清率前後哨排列槍礮以防鈔擊覃聯陞自率親兵策應衝突再四覃聯陞奮不顧身衝入賊隊親兵從旁猛開劈山大礮擊倒馬賊眾哨亦合爲一處正相持間潘鼎新先派把總徐道奎帶隊由畝中突出接應覃聯陞督戰益急賊匪撤退入城是晚副將華爾參將李恆嵩帶常勝軍一千餘名先後到營二十日直逼城下潘鼎新率同胡

鵬飛劉玉林進紫金山東門外察看地勢約分四門會勦我軍甫
開槍礮據報劉玉林已先入城賊大股向西北潛遁潘鼎新等一
面派隊跟追一面入城分營布守卽於六月二十一日克復金山
衛城該逆竄往浙境從此浦東肅清門戶可守堪慰 聖廩又奏
臣同黃翼升於六月十六日行抵松江十七日由泖湖赴澱山湖
該處係青浦崑山蘇州吳江交界直達蘇境之太湖其東岸有已
革提督曾秉忠所部礮船扼守西南北岸處處賊區 臣與黃翼升
督同淮揚四營駛往巡視十八日黃翼升巡至離蘇州七十里之
周莊鎮見水陸賊軍踞橋爲卡飭令副將王東華等排礮齊攻焚
毀賊卡逆眾登岸開洋槍抵拒黃翼升督軍截住賊船攔頭夾擊
王東華等帶隊上岸迎勦賊紛紛敗走黃翼升由後河鈔出當將
賊巢燒毀共殺賊十餘名焚奪賊船十餘隻十九日復回泖湖會

合會秉忠由章練塘等處繞至洙涇漸近浙江嘉善平湖各縣邊界二十二日回至上海老營查松江以西與蘇州接壤南與嘉興接壤湖河泛漲港汊縱橫岸低橋少水戰最宜將來夾攻蘇浙必須由此取徑惟面面皆通須有得力三板飛划四五百號乃敷分進牽制之用黃翼升所帶戰船僅二百號除分撥金陵揚州六營共百二十號外到滬僅八十號臣見將黃浦舊存礮船修整改造三四十號尙未竣工仍須會商會國藩另籌辦法淮揚水師自去春成軍協戰鄂皖江西各處血戰踰年克復名城數十此次由九洑洲賊壘橫衝而下弁勇傷亡近百名船身多被礮洞穿須趁三伏油艙修補臣商令會秉忠嚴束所部分堵各隘口俟黃翼升船隻修好再行添調前往抽替會籌防剿上諭李鴻章奏克復金山衛城並巡視泖湖情形各摺片金山衛爲江浙要衝見經官軍

攻克則地勢軍情均可得手卽著督飭各軍攻克青浦嘉定俾上海益形鞏固前據慶端奏稱浙省紳團進攻新昌等處疊諭左宗棠派兵進剿而該撫駐師衢州難以兼顧見旣克復金山則對岸卽係餘姚著李鴻章探明情形咨商會國藩酌量妥辦於進兵籌餉均有裨益李鴻章膺此特簡自當不分畛域通籌大局用副委任降酋劉玉林已准以都司補用並賞戴花翎惟此輩半多桀驁不馴務當隨時察看恩威並用方可始終如一以收實效籌辦舢板飛划以爲進剿蘇嘉之用甚爲妥協該處汙港狹隘長江師船運掉不靈卽著商同會國藩迅速籌辦免致臨時掣肘浦東見已肅清鎮江情形仍須隨時探明如果軍情較緊著仍遵前旨分撥兵勇畱防上海卽親統所部前往駐紮先據形勢另片奏請將高長紳等革職等語已降旨照所議行閔釗等旣已革職金鴻保亦

不得姑息著李鴻章一併嚴參俾貧劣之員知所做畏將此由六
百里諭令知之○辛卯諭內閣沈兆霖奏撤回震懾兵威悔罪投
誠一摺撤回率眾擾及戎循兩屬前經官軍進剿雖疊經懲創尙
未帖然受撫本年五月間沈兆霖嚴飭各營員弁由札思觀率領
戎屬各營及兵番團勇過山進剿其茶堡一軍亦閒道來會連日
大小五六十戰斃賊四千餘名焚毀回莊多座該匪被剿窮蹙該
喇嘛百戶及總約馬歸源率領十三工頭人六七十名並撤回三
百餘人至代理巴燕戎格廳通判王錫文處跪求投誠道員楊炳
銓過山受降撤回五千餘眾列跪道旁誓願永作良民並由番族
百戶加具保結戎循一帶地方居民見已如常安帖辦理甚屬妥
速所有在事出力文武員弁著沈兆霖擇尤保奏以示鼓勵○諭
議政王軍機大臣等前因蒲城被圍疊經降旨令成明全軍渡河

迅解蒲城之圍以期節節進剿茲據成明奏派侍衛阜成赴朝已查探回稱蒲城被圍情事朝邑無從而知並途中難民過河回家者不少見擬調山西防河官兵八百五十名帶赴軍營由華陰大路會同孔廣順馬德昭各軍分路夾剿等語蒲城是否被圍阜成何以僅至朝邑卽不前進所稱無從而知詞甚閃爍恐其並未前往成明聞難民過河回家心始稍安是否確知蒲城縣並未被圍所奏殊未明晰著成明切實偵探如蒲城被圍甚急自應剋日渡河先解蒲城之圍再圖進剿如蒲城之圍已解卽著統帶官兵由潼關向西進發與豫省已抵潼關之楊飛熊一軍會合攻剿以壯聲威所有山西防河參將鄧鳳林遊擊興岱等管帶官兵八百五十名卽著英桂飭令該員等管帶歸副將珠爾杭阿統帶前赴成明軍營聽候調遣後路應否添設援兵仍著英桂酌辦至據探回

匪仍在華州華陰一帶肆行鴟張潼關大路文報自必梗塞著瑛
榮於孔廣順馬德昭所部抽調一軍由省向東進剿與京兵聯絡
以期肅清驛路惟孔廣順等軍縱能東下沿途尙有梗阻成明豈
可株守潼關靜待陝兵前來始作進攻之計該署提督當激勵將
士出奇制勝以副委任至成明所稱整隊前往其鑼鍋帳房擬寄
存潼關派兵看守等語想係因瑛榮前此咨會車馬無從雇覓故
置鑼鍋帳房於不用惟既係裹糧前進卽須於所帶兵丁嚴加約
束不准絲毫騷擾民間其放餉章程並著英桂速行籌定放給毋
稍延誤豫省入關之兵是否楊飛熊管帶抑係鄭元善所派之張
寶禧一軍著成明探明後卽行會同進剿徐營柱見在駐軍何處
如宛南竄匪毋須該署總兵回剿卽著鄭元善飭赴陝省會剿以
厚兵力多隆阿未到任以前陝省東路之各省援兵著統歸成明

暫行節制將此由六百里各諭令知之○諭沈兆霖奏撤回悔罪投誠並陝省回民滋事內患日深宜急籌妥辦各一摺撤回回匪被勦窮蹙乞降沈兆霖察其情詞哀迫出於至誠自應准其就撫以省兵力戎循一帶地方見已安帖著沈兆霖督飭該鎮道等將善後事宜妥爲辦理務令民回永遠相安毋再尋釁滋事首犯馬尒三罪在不赦經總約馬歸源稟請俟准撫撤兵後密圖誘獲志在必得著卽責成該總約迅將馬尒三擒獻毋任乘間免脫貽患將來至陝省回匪圍逼同郡蒲城近復攻撲省垣自應懾以兵威再行議撫沈兆霖所籌與近日寄諭均相脗合惟甘省邊邑處處與陝接壤該回匪已有傳單到甘且甯夏府屬之靈州有回民入境買馬製造軍器之事情殊叵測著沈兆霖密飭該地方官妥爲防範並飭催避難回民全數回陝以期消患未萌其省城關廂及

河州固原等處回族仍著該署督嚴密查察妥爲鎮撫毋令與陝省逆回勾結蠢動本日據英蘊等奏甘肅藩庫欠解回疆經費過多請飭陝甘總督措撥經費等語回疆各城籌辦兵餉除勸捐收稅外別無他策著沈兆霖速飭藩司將應解回疆各城經費分別撥解以資接濟而靖邊隅將此由六百里諭令知之○諭劉長佑奏督軍抵潯籌辦防剿情形一摺前因恭城土匪結黨抗拒官軍曾經諭令該撫認真剿辦見在該撫出省將平梧各屬軍情次第布置黃三股匪既多且悍就撫後雖未出巢而其黨梁大口扒等仍敢肆出焚掠蔣澤春等出隊何以未甚得手有無挫衄不可僅據稟報一面之詞潯屬各匪沿江劫掠向爲積年巨寇逆首黃三尤屬罪大惡極豈容久稽顯戮著劉長佑督飭平梧等處畱防兵勇將分竄各匪嚴密堵剿並飭蔣澤春鄭金華等軍奮力攻剿悉

數殲除毋貽後患該省餉精支絀所有廣東湖南協餉著卽咨令
該督撫迅速籌撥以裕兵食將此由六百里諭令知之○諭徐
宗幹奏籌辦臺匪情形並遵查被參各員劣蹟各一摺彰化匪徒
分犯嘉義鹿港等處雖經官軍擊退究未痛加剿洗逆首戴萬生
踞守縣城匪眾尙多曾玉明等已由鹿港登岸並有軍功施九挺
等募勇協剿卽著徐宗幹激勵將士迅將彰化克復以傾賊巢儻
臺匪肅清在事官紳必當破格獎勵若日久無功亦必從嚴懲處
著該撫傳知在營官紳剋期剿滅毋稍遷延其所需軍餉並著由
省籌解參將林文明激於義憤願赴臺助剿頗堪嘉尙卽著該撫
咨調臺勇一千名交其統帶迅速前往林文察在浙剿賊朝廷察
其奮勇昨已特簡四川建昌鎮總兵並著徐宗幹傳諭林文明使
知朝廷衡功示賞不遺在遠若該員奮勉圖功必能仰邀殊恩以

副期望知府李鼎等已照議革職歸案審訊該員等劣蹟昭著若不嚴行懲辦則官方吏治何由整肅著徐宗幹懷遵前旨將該員等劣蹟迅速查辦從嚴懲治不必候耆齡到閩致涉遷延彌縫該撫以降調之員特旨起用封圻受朝廷特達之知但當實心任事不必有所瞻顧致負委任閩省吏治廢弛已久此次查辦各員牽涉甚多恐一時委用乏人著該撫於通省屬員中畱心訪察如有才德出眾及潔已愛民之員無論候補實缺出具切實考語密行陳奏以備簡用將此由六百里諭令知之○諭前因常清等奏阿勒坦沙拉久居俄國首鼠兩端當經諭令該將軍等訪查辦理並以哈薩克地接俄界應妥爲防範茲據常清等奏俄國匡蘇勒官雜哈勞於呢瑪圖一帶設立卡倫阻我赴勒布什之路復於沙拉托羅海地方率兵攔阻聲稱哈薩克布魯特爲該國地方並於郭

爾果珠勒卡倫搶奪牲畜什物請飭查照舊章理論禁止等語哈薩克布魯特地方俄國久已窺伺此次該國率兵攔阻是阿勒坦沙拉早已順從其應襲汗爵卽著常清等揀擇應襲之人奏明承襲該處及布魯特地方何時爲俄國誘從據其文憑所言則該兩處地方俄國竟據爲己有必應查明原委方可酌辦著常清等迅速查明該將軍等到任未久無所用其回護本日諭知總理各國事務衙門與之理論明誼明緒見在赴塔爾巴哈台查勘地界並著將此事與俄國公使剴切理論各守疆界其匡蘇勒官雜哈勞詭譎情形亦應告知該公使使之安分守約以敦和好庶可久遠相安事關外國侵占邊界明誼等務當竭力籌辦斷不可含糊了事以副委任常清等摺並俄國文各一件均著鈔給明誼等閱看明緒雖經簡放伊犁參贊大臣其會勘西界事宜仍著會同明誼

委爲辦理俟辦理完竣再赴新任將此由五百里各諭令知之○

壬辰允成明請飭河南壯勇赴陝會剿○以工部尙書倭仁協辦

大學士○以恩齡爲內閣學士由鑲藍旗蒙古副都統遷○癸巳 慈安皇太

后聖壽節停止 升慈甯宮○諭議政王軍機大臣等僧格林沁

奏督軍追剿東竄兩股賊匪及撲犯黃冢擒匪均獲勝仗一摺據

稱擒匪任縛得王廣繼等率眾由徐州府迤西向東北分股奔竄

德楞額督兵截擊斃匪多名蘇克金等趕至嶧縣殲除二千餘名

王廣繼竄入雲谷山中與棍匪勾結德楞額派參將李其昌帶隊

堵剿自與蘇克金馬隊馳抵曹巴集會合田在田追至睢甯縣黃

山石峽地方共斃匪四千餘名餘匪奔回老巢西路擒股劉狗兒

等撲至黃冢經侍衛卓明阿等督隊剿擊殲除賊匪二千餘名所

辦均極得手著僧格林沁飭田在田將曹巴集餘匪追殺淨盡毋

令倂歸老巢並嚴飭德楞額將雲谷山攻克王廣繼一名務須剿除勿任再行旁竄營總恆齡等駐紮亳州迤北業將竄賊大加創懲當可趁此聲威一鼓攻克盧廟一帶捻圩著俟天氣晴霽泥潦漸乾卽與鄭元善毛昶熙等會籌進剿老巢以清捻患摺內所稱總兵黃開榜稟稱此股西捻擁眾數萬該總兵會同黃國瑞帶領礮船早勇沿河布置原稟長篇累牘盡屬支離並未言及德楞額等剿勝情事比及蘇克金等回營查詢賊匪不過一萬未聞沿河有黃開榜帶領礮船與賊接仗之事已行文吳棠詳細確查等語此股捻匪竄擾黃開榜是否與賊接仗著吳棠查明據實具奏該總兵武夫不知筆墨必係辦理文案之人代爲鋪張嗣後須令事事務實不可稍涉虛浮若有意瀆稟冒功卽著嚴參懲辦其田在田被參各款著吳棠迅速會商僧格林沁覆奏毋再稽遲將此由

五百里各諭令知之○甲午諭內閣瑛棨奏多隆阿自武昌來咨據稱見飭雷正綰馳抵襄陽暫爲休息再行入陝等語多隆阿既奉督辦陝西軍務之命責任甚重自應兼程赴陝立解倒懸乃竟任意遷延屢催罔應又不遵旨先飭雷正綰帶兵迅速赴援實屬玩視軍務不知緩急官文既不遵旨嚴催而於多隆阿行抵何處兩月以來並無一字奏報亦屬顛預玩泄罔顧大局官文多隆阿均著先行交部議處仍著官文嚴催多隆阿等剋期赴陝實力勦辦以贖前愆儻敢仍前延玩貽誤戎機必將多隆阿等從重治罪決不姑容○諭議政王軍機大臣等據托明阿等奏毛震壽勦辦鄧逆一股大獲全勝餘賊僅存數百名與藍逆合股竄入洋縣毛震壽督勦屢勝該逆退守不出我軍膽氣愈壯勦除可望迅速等語此次川軍入陝卽能將鄧逆殲除足見平日訓練尙屬得力惟

洋縣失守情形殊出情理之外見在毛震壽督兵進剿能否迅速殲除瑛榮於漢回互鬪之事已屬一籌莫展豈能望其顧及漢中此軍本係駱秉章派往仍著該督嚴飭各軍迅將藍鄧餘匪殲除毋任滋蔓再據徐之銘奏林自清不候諭旨擅自入川見飛札調回並請飭知府翁祖烈知縣朱鳳樓袁祖蕙等開復赴滇差委畱川差委之候選道章源仍歸部選各等語覽其所奏無非意存營私已批諭翁祖烈等開復及赴滇差委之處不准行矣該員等聲名平常人所共知而該撫稱其公正勤直不知鑽營翁祖蕙是否卽係袁祖惠著查明與翁祖烈朱鳳樓一併勒令回籍免生事端道員章源前經駱秉章奏請畱川差委降旨允准茲據徐之銘稱該員在滇官聲太覺平常以營謀爲事請飭赴部候選不准畱川是否徐之銘所奏別懷私見抑實係章源不能得力卽著駱秉章

據實奏聞毋稍徇隱林自清已否赴省謁見其練眾能否遣散徐之銘所奏札調回滇諒亦徒託空言以爲搪塞地步並著駱秉章酌量辦理將此由六百里諭令知之○諭托明阿瑛榮等奏回匪圍攻六村堡官軍出隊援剿情形請飭催多隆阿等兼程前進並請飭成明統兵來陝會剿及查探張芾等尙無消息各摺片覽奏曷勝髮指陝省回匪猖獗節經諭令官文嚴催多隆阿星馳援剿迄今兩月既無入關消息且無隻字奏報朝廷諭旨輒敢視同弁髦著官文多隆阿將因何並不覆奏之處明白回奏陝省軍情如此緊急耽延一日荼毒無數生靈糜爛無數地方多隆阿等即使有所牽制不能倍道赴陝亦應卽時具奏朝廷不難另調勁兵星馳前往乃該省望兵如望歲而多隆阿等紆道武昌遲延不進是此兩月內陝省生靈之慘遭焚殺皆官文多隆阿等貽誤之罪本

日業經明降諭旨將官文多隆阿先行交部議處仍責令該將軍督率大隊剋期赴陝盡力剿辦若再遷延定將多隆阿等從重治罪決不寬貸六村堡被賊占踞距省止二十餘里南路軍情更覺喫重著托明阿瑛榮等將省防妥爲布置仍不時激勵兵勇協同附近練堡力遏兇鋒毋稍鬆懈本日瑛榮奏請嚴催成明渡河駐軍同州以定民心而牽賊勢著成明酌度情形辦理成明所部三千兵力尙嫌單薄楚軍旣無到陝消息必須另派勁旅相機策應勝保接奉疊次諭旨計不日可抵河洛著卽籌撥馬步三四千名派得力員弁管帶趕緊入關歸成明調度分投援剿毋稍延誤該大臣仍親駐河洛調度豫省一切剿匪事宜以專責成聞鄉縣應否駐兵防守著勝保斟酌辦理張芾前往倉頭鎮前據瑛榮等奏回匪賊去羈西何以馬百齡聲稱張芾等往勸漢民馬百齡分勸

同民從此分手再未晤面其說殊難憑信馬百齡是否患病仍著
瑛榮嚴飭該員晉省追究張芾等下落據實奏聞托明阿等另摺
奏官軍進剿前股川匪大獲全勝逆首就戮洋縣百姓開城迎賊
商南境內一律肅清等語朱啞二逆業經官軍陣斬鄧逆是否傷
斃仍著瑛榮等飭令毛震壽確切查明毋令死灰復然致滋後患
至藍逆大股由西鄉竄過漢江直抵洋縣知縣汪淮督率兵勇固
守何以百姓私餽金銀開城迎賊是否民心忽變抑或奸細豫先
埋伏勾結內應汪淮平日有無虐民之政著瑛榮卽飭毛震壽查
明辦理洋縣之賊若再竄往東北與同匪勾結則陝西省垣更形
危急卽西防務既鬆則防卽之兵應分撥出境迎擊以剿爲防著
官文等迅速調派交金國琛統帶赴陝聽候諭旨將此由六百里
加緊諭令知之○予陝西陣亡協領圖克唐阿等祭葬世職建祠

並遊擊敬芝蘭等祭葬世職○乙未諭議政王軍機大臣等鄭元善奏粵匪合股竄擾唐桐泌各境逼近郡城並渡河圍攻各摺片前因西路軍務緊要疊經諭令勝保駐紮河洛將豫省腹地廓清此時宛境被擾賊眾兵單自應先其所急著卽督率兵勇前赴南陽迅速剿洗勝保前派之王佐臣一軍見已行抵何處著催令先行赴宛會同圖塔納各軍併力兜剿其竄擾南召縣之維摩寺等處賊匪該處爲上次入陝舊路亟宜設法截剿著勝保鄭元善酌派得力員弁統帶兵勇繞出賊前迎頭截擊毋令闌入陝境昨因陝省回匪猖獗諭令勝保籌撥馬步兵勇三四千名入關援剿該省望援甚急而南召竄匪又駸駸有向陝之勢且恐陝省回匪勾結此股賊匪前去爲患不小勝保惟當督飭將士會同豫省官軍併力扼剿杜其入陝之路如有疏虞惟勝保鄭元善是問南陽距

襄樊不遠該處防兵素稱得力著官文等飭令越境夾擊以勦爲防務將此股匪眾聚而殲旃毋畱餘孽將此由六百里諭令知之○丙申有眾星西南流如織○上詣觀德殿 文宗顯皇帝几筵前行中元大祭禮○丁酉諭內閣吳棠奏扼剿西捻獲勝邳宿運河南岸肅清一招逆捻竄擾邳州意圖搶渡運河總兵黃開榜分撥礮船沿河扼守黃國瑞督率陸軍渡河進剿生擒賊目王春玉正法斬馘甚多該逆大股屯聚運南官軍水陸齊進斃賊二千名副將姚廣武等禦賊於張家集先後斃賊五百餘名黃開榜督隊乘夜進劫貓兒窩以南各賊柵縱火延燒連拔賊柵十一處姚廣武等追賊至舊邳圩復殲斃賊匪三百餘名該逆繞竄宿遷復經官軍擊退敗匪由睢甯境內遁回老巢運河南岸一律肅清仍著吳棠督飭各員嚴扼要隘毋任再行竄擾所保出力之總兵黃

開榜前據僧格林沁奏接據該總兵稟稱沿河剿賊各情言語支離業經諭令吳棠查明具奏著俟奏到時再降諭旨○調宋晉爲倉場侍郎以王茂蔭爲工部右侍郎候補侍郎○予故漕運總督邵燦祭葬諡文靖○廣山西鄉試中額一名○允江西饒州建昭忠祠以陣亡參將李達春入祀州判左楷等附祀○戊戌 上詣觀德殿 文宗顯皇帝几筵前行初周年大祭禮○袁甲三奏查金馬胡各圩坐落靈壁縣東南臣於收撫後派員清查戶口金馬胡六圩計九百六十七戶老幼男丁不足二千人其前隨丁潮臣西去者僅二百二十名均有冊籍可查此外附近之校塘廟等二十餘圩被徭去者又六七百人先至蒙城之移村集爲苗沛霖調至江口集旋因無糧放歸曾據練總副將邵徵祥等具稟乞恩均願回家安業自應准其回圩以安反側且使知從官之安勝於從苗隨

諭每四五十人爲一起由九灣過河東歸並飭沿途各營將弁安爲彈壓見據邵徵祥稟報金馬胡練丁業已陸續回圩並據駐防金馬胡守備陳德厚稟稱按冊點驗前次西去練丁均已全數回圩並無一人在外開具清單呈送前來覈與勝保所奏二萬餘人悉數譁歸並懷憤尋鬪各情大相逕庭臣不知勝保何故造爲此言上煩宸慮也至丁潮臣本係夏邑捻匪投入苗練管帶馬勇前次騷擾澮北寶苗沛霖之所使畱其母妻在老寨爲質並非澮北土著昨據探報丁潮臣見在潁州南一百十里之簡家集並未帶人東來臣更不知勝保指定丁潮臣爲澮北之練其意何居也該大臣前因臣派兵剿辦會有信函致臣謂係前署藩司張學醇誤聽浮言尋仇報復又鈔送泗靈職員朱庚培等聯名訴稟一紙屬臣量加寬宥免動干戈臣接閱不勝駭異當卽細加查訪朱庚

培等均各在家並未赴勝保軍營其稟內仍以上年壽州官兵勦
擒激變苗練因此泗靈練眾不服爲詞況覈其具稟日期已在
收撫金馬胡各圩移兵勦擒之後其爲苗練捏造希圖挑釁顯而
易見是以置之不覆不料勝保又以練眾懷憤譁歸爲詞率行入
告也將謂勝保以軍務爲重自當一面具奏一面咨臣嚴加堵剿
何以至今並未接其隻字幸而事屬子虛萬一實有其事直至接
奉諭旨再行辦理豈不著著落後該大臣比奏究竟爲公爲私難
逃臣聖明洞鑒夫金馬胡練眾來去人數多寡及臣酌量勦撫情
形共見共聞臣不必與之爭論惟勝保於此等彰明較著之事尙
敢詭詞以亂臣聖聽其平日之膽大欺飾更可概見此後勦撫機
宜正在喫緊應如何杜其簧鼓免致煩臣宸慮而亂軍心出自

聖明乾斷再金馬胡係被丁潮臣等煽惑曾經從苗見雖一律安

靜而丁潮臣尙在苗營恐其再來句引仍當妥爲防範 上諭議
政王軍機大臣等袁甲三奏陳勦撫金馬胡始末及查明隨丁潮
臣西去者僅二百二十餘人丁潮臣尙在苗營並無懷憤譁歸情
事鈔錄查明各圩戶口並副將邵徵祥等稟呈覽詳加披閱似係
實在情形而勝保偏聽苗沛霖之言據以入告其意似爲苗沛霖
夸張所部眾多袁甲三辦理未善冀朝廷於苗練一事姑息遷就
免生事端見在皖省軍務已統歸李續宜督辦著仍遵前旨秉公
辦理如果各該圩反正安業卽著宣布朝廷德意妥爲撫恤袁甲
三單內所開各圩戶多口少可見百姓瘡痍未復殘亡可憫深用
惻然著李續宜曉諭負固各圩如有自拔來歸者卽赦其既往之
罪俾安生業用副視民如傷之意勝保原片並袁甲三覆奏摺一
件單二件均著鈔給閱看惟據袁甲三奏稱丁潮臣尙在苗營恐

前來句引仍當妥爲防範等語著李續宜加意查察毋任丁潮臣
得生詭計李續宜未接欽差大臣關防以前臨淮軍務袁甲三仍
當妥籌防剿毋令反正各圩復有煽惑袁甲三另片奏北路剿匪
情形等語捻逆旣歸併湖溝而張落刑等均回雉河集自應防其
併力來爭卽著袁甲三飭令吳秀等迅將湖溝攻克以杜捻逆東
路門戶儻遲延未能攻克著李續宜將吳秀等嚴參毋稍姑容將
此由六百里各諭令知之○駱秉章奏石逆敗踞長甯日見大兵
逼近勢難久踞於六月初十日撲總兵唐友耕營盤我軍槍礮環
擊斃賊無算該逆屢前屢卻唐友耕見賊勢漸疲縱兵出擊斃賊
二千餘名賊眾意圖就山紮壘以死抗拒唐友耕親督隊伍由右
路繞上山梁火箭齊發賊卽奔潰將該逆未成之壘概行踏毀山
下伏賊約三四千人復被我軍轟擊殆盡賊向石笋一帶遁回總

兵熊煥章一軍初七日移紮洞底甫築二壘賊分數路撲至熊煥章督隊迎敵該逆分股包鈔我軍稍卻賊從壘後撲入時果毅前營相距不遠聞警馳援賊已乘勢焚其棚帳會傳道督飭果毅各營分投迎擊槍礮齊施賊始敗退十一二等日僞宰輔李逆率大股屢向洞底一帶衝撲意欲突竄敘府皆被我軍擊退殲斃老賊甚多臬司劉嶽昭道員會傳理知賊氣已餒遂於十四日分道進剿劉嶽昭親督五成隊由蘇家坡進悍賊蜂擁而出我軍直前搏戰賊勢不支劉嶽昭派赴銅羅井之軍已由左路鈔來右路伏兵復出三面夾攻立將蘇家坡銅羅井賊巢攻拔合軍乘勝進剿斬擒無數復將中峯寺三里坎一帶賊壘踏平賊遂敗竄十六日到嶽昭督軍向龍頭鋪進發前隊甫至有賊千餘人來撲我軍立刺悍賊數十名大股已由長甯出竄會傳理熊煥章及參將吳嘉谷

分路追至署敘州府知府孫廉等所帶兵勇隨同進攻當將長甯
縣城克復唐友耕率隊馳至石笋一帶遇該逆萬餘人奪路奔竄
唐友耕揮兵截殺斃悍賊數十人沿途追殺一千餘人該逆勢已
窮蹙日夜狂奔向興文瀘衛一帶逃竄臣慮其繞赴納溪偷渡大
河檄飭各路官軍節節布置以顧敘府該逆仍由原路回竄敘永
廳欲撲永甯縣城適由黔來川之總兵吳安康帶勇行至敘永廳
屬之大壩聞賊竄至整隊迎敵立將賊匪擊敗吳安康恐永甯有
失督隊兼程前進馳抵永甯城下揮兵力戰該逆不敢進逼吳安
康所部已紮營城外代辦敘永廳同知劉廷植永甯縣知縣衛元
變復率紳團登陴固守臣卽嚴催諸軍兩路追剿並飭合江江津
等縣嚴防下游務將該逆逼至川黔邊界以圖聚殲 上諭駱秉
章奏官軍進攻石逆連破賊壘克復長甯縣城一摺此次石逆被

勦窮蹙圖撲永甯縣城雖經總兵吳安康等力戰賊不敢逼惟該逆並未大受懲創難保不狡焉思逞著駱秉章嚴飭熊煥章唐友耕會傳理各軍分路迅速追勦與吳安康所部合力夾擊並飭合江江津等縣嚴防下游毋令偷渡務將此股巨憝逼至川黔邊界聚而殲旃以靖疆圉本日有人奏洋縣西鄉據漢江南北水陸之險若令賊匪久踞險要悉爲賊有勦辦益難等語見在陝省回匪勢極鴟張瑛榮一籌莫展豈能顧及漢中此軍本係駱秉章派往仍著該督飭令毛震壽專勦陝南賊匪俾令事權畫一以期早日廓清將此由五百里諭令知之○譚廷襄奏鄒縣教匪復於六月二十九日出巢當經泗水防兵截回臣派遊擊謝炳帶勇七百餘名馳往曲阜臣卽暫駐泰安督飭諸軍分投籌辦茲據署嶧縣知縣張振榮稟報六月三十日擊敗雲谷山賊匪王廣繼僅存五六

百人由雲谷山竄往費縣抱犢峒等處藏匿又據署沂州府奎芳等稟報七月初七日都司姜順等會同署蘭山縣知縣長賡帶兵巡哨行至城西武得匪圍誘賊出寨立斃三十餘名該匪遁入圍內堅壁不出臣查蘭費兩屬匪圍大小數十處其間負隅抗拒者固多而首鼠兩端者亦復不少偏之過急則西連教匪爲患滋甚臣已嚴飭在事文武擇要先攻並散其脅從以期勦撫並施至鄒曲教匪所踞鳳皇山白蓮池在鄒曲泗費滕五縣之中峭壁層巒甚爲險峻山中男婦數萬大半皆係裹脅匪首盤踞其中時將掠得糧石散給養贍爲之守禦匪巢西面之土旺村路通鄒縣大道早經被占將山口砌築關隘有賊屯踞東面之王山村在泗費兩屬交界路通費縣其南北兩面層峯疊嶂間有小道車騎難通若欲進兵非東西兩面齊入南北扼截使其首尾不能相顧難期得

手見在東路蘭費之幅匪未清兵勇無可分撥臣與總兵扎隆武等所帶馬步各隊實在可以合併打仗者不及三千專顧西路已屬不敷未可再行分布東路且見時山內草木叢雜天復溽暑時晴時雨馬步皆屬難行探聞匪巢存糧無幾秋成在邇必將大股四出覓糧進剿機宜亟須豫備若臣遠赴沂郡誠恐一時未能回顧適接僧格林沁來函以蘭嶧南路必當督飭德楞額認真出力不任鬆懈惟北路鞭長莫及屬臣酌覈勦撫兼施並因德楞額等追擒至徐大獲全勝匪蹤遠遁已飭德楞額折赴嶧縣其扎隆武之隊即可撤回以固藩籬而壯聲勢臣已飭調扎隆武等同軍鄒曲臣擬於日內先由秦安進駐兗州體察情形居中調度其蘭費一路臣已揀派員弁馳往會同該府縣聯絡團練速議勦撫並查王廣繼敗匪究竟藏匿何處一俟蘭費事有端緒可以提兵西向

不爲幅匪牽掣再由兗郡會兵合擊方可埽穴擒渠

臣

所部兵勇

本屬無多仍當設法添募得力勁旅以便進兵剿辦股匪

上諭

前因東省剿辦幅教各匪無大員統率諭令譚廷襄前赴兗沂適中之地以期兼顧該撫據僧格林沁文內有北路酌覈剿撫兼施之語擬卽駐紮兗郡惟旣云先剿蘭費一路幅匪再行會合夾擊教匪自應分撥馬步東向會同德楞額將幅匪併力剿除若駐紮兗郡則距東路蘭費較遠駐軍於無賊之地卽出省督辦亦有名無實著仍遵前旨進紮兗沂適中之地以期東西兼顧並派撥馬步乘此教匪未出之前將幅匪先行剿除免致爲所牽掣不得擁兵自衛坐觀成敗如教匪有出竄之信仍著撥兵堵截其王廣繼敗匪藏匿何處並著查明進剿悉數殲除譚廷襄另片奏請調遮克敦布馬步來營等語見據文煜奏稱威縣餘匪復聚眾千餘意

在臨清州下堡寺會齊該副都統營中馬步未便調往威縣界連直東務當三面兜剿卽著文煜譚廷襄遮克敦布乘此甫經蠢動之際酌撥兵團趕緊撲滅淨盡儻任其猖獗致成巨患必將文煜等重懲懷之勉之將此由六百里諭令知之○命愛仁王茂蔭密查陝西吏治○命成明駐同州防賊渡河並會同援軍剿擊○改派署工部尙書阜保恭理喪儀○擢直隸知州秦聚奎署大順廣道會同副都統遮克敦布辦直東交界防剿事宜○己亥諭內閣前因光祿寺卿潘祖蔭給事中卞寶第先後奏參總兵田在田駐軍徐宿殺團冒功縱兵搶掠各情當經降旨交僧格林沁吳棠查明嚴參茲據僧格林沁等奏田在田在宿遷剿賊有與民鬪口角並無開槍攻毀民圩搶奪器械情事惟於千總田藍田搶奪民物毆辱委員等事經吳棠咨查並未具覆顯係心存回護六月間遣

勦會捻各匪該總兵遷延落後所帶勇隊搶擄財物並不卽時查辦迨捻逆殘破該總兵自任追勦總以兵疲餉絀爲詞觀望不進且性耽安逸日晡未起難期得力等語田在田以專閫大員督辦軍務委任不爲不重乃庸懦無能旣不知約束兵勇又不能實力攻勦一味巧飾希圖安逸沾染軍營惡習實屬孤恩溺職田在田著卽革職以爲怠玩軍務者戒○諭議政王軍機大臣等據僧格林沁等奏遵查田在田被參各款一摺已明降諭旨將該總兵卽行革職矣惟據奏稱該總兵所帶之軍悉歸吳棠統帶揀派得力將領赴徐勦辦自因僧格林沁營內無得力大員可派第徐州爲南北襟要必得謀勇兼優足以獨當一面者方可勝任著僧格林沁會商吳棠於清淮軍營內酌派一員迅速前往統帶仍歸僧格林沁節制以資攻勦其該處軍務卽由僧格林沁吳棠統籌兼顧

庶調度得合機宜不至任賊北竄清淮防剿喫緊吳棠自刻不可離秋間大舉之時吳棠儻必須親自前往清淮防剿事宜仍應設法兼籌以免疏虞田在田雖經革職徐宿一帶軍務仍著僧格林沁吳棠責令實力辦理不准鬆懈一俟派有接替之員方准交卸回籍其田藍田搶奪一案卽著吳棠查明嚴參以肅軍律將此由五百里各諭令知之尋奏遵查田藍田雖無縱勇搶奪情事惟約束不嚴實屬庸懦應請卽行革職從之○庚子諭內閣據恭理喪儀王大臣等合詞奏懇奉移 文宗顯皇帝梓宮請朕準禮節哀步送至景山東門外一摺朕受 皇考顧復深恩哀思罔極卽照前旨步送至地安門外亦豈足以盡依戀之忱且朕年在冲齡雖積哀之餘尙不至過形勞勩今王大臣等諄詞籲懇若依所請止送至景山東門外而止朕心實所難安惟念從前奉移 皇祖宣

宗成皇帝梓宮時會奉 皇考諭旨步送至南海淀嗣因王大臣等合詞籲請仍躬親送至恩佑寺恩慕寺之南敬溯 舊儀朕亦不敢過禮此次奉移 皇考梓宮朕當步送至景山後跪俟 靈輦經過再由間道豫往 蘆殿祗候跪迎藉以少申哀慕王大臣等不必再行瀆請○諭甘肅布政使恩麟奏署陝甘總督沈兆霖於七月初二日自碾伯縣起程回省初四日行至平番縣屬之三道嶺溝地方猝遇雨雹山水漲發致將該署督行轎關防並隨從兵役人等概行沖沒隨員陳象沛等在後聞信與該處文武各員先後馳救無及旋即尋獲該署督遺軀妥爲料理等語覽奏不勝駭異沈兆霖忠清亮直歷練老成由翰林游陟清要疊掌文衡在上書房南書房行走蒙 皇考文宗顯皇帝擢授正卿朕御極之初復授爲軍機大臣往陝甘查辦事件旋命署理陝甘總督該署

督授任以來卽帶兵出省實力辦理已有成效乃於途中猝遇山水漲發遽爾身殞悼惜殊深署陝甘總督軍機大臣戶部尙書沈兆霖著加恩晉贈太子太保照尙書例賜卹任內一切處分悉予開復應得卹典該衙門察例具奏並著查照一品大員沒於王事例案聲明請旨其靈柩由甘肅起程時著沿途地方官妥爲照料並准其入城治喪伊子沈雲驥著賞給舉人准其一體會試以示篤念忠釐之至意○諭議政王軍機大臣等勝保奏統籌陝豫緩急督軍馳赴河洛派援南路並南陽軍情緊急疊據關中官弁函稟陝省情形鈔錄呈覽各摺片陝省回匪鴟張疊經飛催多隆阿之軍星速入關而遲回未進正深焦急茲據勝保奏粵匪攻撲南陽甚爲喫緊此股逆匪本係由廬州分股出擾又與漢東大股會合意欲窺伺楚疆以擾楚師後路適多隆阿在隨州棗陽一帶布

置嚴密復又竄回攻撲南陽其南召縣境之博望鎮一帶已有賊蹤可由魯山盧氏挾犯河陝並有仍將西竄陝省之信等語多隆阿一軍已阻於賊之南爲所牽掣不能赴陝諒係實在情形陝省軍情萬緊回匪兇燄正熾省外各屬肆行焚殺極爲慘毒亟須速整大軍痛加懲創方可殄其兇鋒卽著勝保統領全軍星馳赴陝督辦陝西軍務所有該省各路官軍均歸節制關中形勝最要之區該大臣膺茲重任自當奮力先驅督率所部迅速前往將回匪盡力痛剿立解省圍其同州蒲城等處應如何分軍援剿均著到陝酌度辦理回民人數過多且其中亦多良善被脅之徒將來如果被創能知悔懼亦必當勦撫兼施惟此時逆燄甚張斷不許先存安撫之心輕議招降致爲逆黨所窺愈得肆其兇狡南陽賊勢亦張著鄭元善迅速移兵葉裕親督勦辦務將栗河店盤踞之匪

迅行攻剿勝保仍飭副將王佐臣之軍與豫省合力剿辦尤須力顧賊由博望北竄之路毋令得肆豕突楚省藩籬最關緊要多隆阿既阻於賊不能赴陝著官文卽飭多隆阿一軍由隨棗前赴南陽一帶力籌防剿與豫省官軍前後夾擊痛殲醜類曾國荃等軍已偏金陵之雨花臺而兵力尙單見在多隆阿之軍既可無須入陝應於何處駐紮著曾國藩酌量調派一面迅速具奏雷正綰所部計已山襄鄖行近陝疆仍著飭令星速入關俾資調遣勝保入陝仍應兼顧豫省其河洛等處土匪應如何懾以聲威消其反側仍卽妥爲籌辦陝省軍報不至又經數日自六村堡陷失後情形又復如何瑛棨等務當竭力固守以待援師將此由六百里加緊各諭令知之○諭本日因南陽粵匪竄偏楚疆多隆阿阻隔賊南未能赴陝援剿諭令勝保卽日馳赴關中剿辦回匪節制陝西軍

務該大臣兵勇口糧積欠甚鉅饑軍枵腹荷戈深虞譁潰且關中軍務緊要尤應趕籌接濟以利進行著英桂瑛榮無論何款各先行籌撥銀三四萬兩解赴勝保軍營並著譚廷襄每月籌撥該大臣軍餉一萬兩源源撥濟毋得稍涉推諉致有貽誤將此由五百里各諭令知之○以羅惇衍爲戶部尙書李棠階爲左都御史毛昶熙爲禮部右侍郎

由內閣學士遷

○以熙麟爲陝甘總督

由戶部右侍郎遷

未

到任前以甘肅布政使恩麟護理○辛丑諭內閣前因給事中孫楫奏參雲南學政張錫嶸條陳宗祀典禮語多謬妄當經降旨交原議王大臣等會同詳悉議奏茲據王大臣等奏稱張錫嶸欲舉行宗祀大典因附陳所撰宗祀條說旁引曲證以期事在必行於經史中諸儒陳說有可比附者毫無抉擇遂致支離牽合意雜言龐該學政身居館職疊經簡任文衡於累朝掌故均應練習

乃陳奏 配享大典於 聖祖仁皇帝孝經衍義一書未經詳慎
尋繹引證諸說乖謬殊多實屬條奏失體請交部照例議處等語
翰林院編修張錫嶸著交部照例議處○調崇綸爲戶部右侍郎
以麒慶爲工部左侍郎由內閣學士遷○壬寅諭議政王軍機大臣等愛
仁王茂蔭奏遵查瑞昌等被參各款大概情形一摺瑞昌係屬臬
司應得廉俸歲有定額即使自奉省裔亦何能於數日間積有餘
銀購買赤金五百兩之多其爲贖貨營私已可槩見恐該革員所
買赤金尙不止此數必應徹底查辦沈巢生開設鹽店已有確據
該店夥提解到省不難嚴切根究著愛仁王茂蔭於該二員參款
悉心審辦毋任隱匿狡展其鍾秀穆克金布崇泰各參款雖較瑞
昌等略輕惟事關貪緣賄謀於吏治甚有關繫著一併查審具奏
至陝省被參各員情節尤重該省見在情形亟宜整頓著愛仁等

將山西省應辦緊要情節迅卽審明定擬後探明道路馳赴陝省
秉公查辦有人奏馬德昭在江蘇縱兵搶掠並係川省回人恐不
足恃等語馬德昭所部在蘇城焚掠實有其事朝廷因其前在揚
州頗著戰績棄瑕錄用儻其才尙可用亦不能因係回人稍存歧
視前據瑛榮奏稱馬德昭在西安連次勦賊獲勝是否實有其事
如果不知感激奮勉深負再造之恩亦必當重治其罪並著愛仁
等於抵陝後訪查具奏原片著鈔給閱看將此由四百里諭令知
之○諭勝保奏見探陝西南陽情形同時並緊鄭元善奏南陽府
城被圍緊急各一摺髮逆緊急偏南陽四面環築礮臺城中信息不
通亟應添兵助勦迅解城圍勝保見已飛飭王佐臣等馬步各隊
由魯山一帶進援著卽嚴飭該員等星速前進直抵宛城並著鄭
元善速飭駐紮裕州之盧得勝一軍會同援勦毋許延誤據勝保

奏多隆阿所部見在隨東與南陽切近若令移兵進剿順而易成
並據鄭元善奏襄樊向有重兵業經飛咨官文等分飭防兵越境
會剿雷正綰軍既爲賊匪所隔均卽毋庸赴陝著官文移咨多隆
阿統帶全軍並雷正綰一軍馳赴南陽會同勝保鄭元善所派各
軍合力兜擊以期盡殲醜類毋再蹈援陝故轍遷延不進貽誤事
機至陝省回匪兇燄日熾昨日降旨命勝保督辦陝西軍務勝保
統籌全局擬由洛陽直趨潼關進援西安以保全陝所奏甚合機
宜陝省望兵如歲著卽督飭烏勒興阿等帶領馬步大隊剋日進
關節節掃蕩殲除逆匪安撫居民俾關中一律廓清以副委任托
明阿年力已衰筆帖式裕綸所稟不爲無因著勝保馳抵西安時
將所稟各情確切查明據實參奏再降諭旨洛陽會元局逆首已
誅如該處民情安戢著勝保卽飭楊長春統率四營迅赴南陽以

厚兵力將此由六百里加緊各諭令知之○以王憲爲河南按察

使

由開歸陳許道遷

並署布政使○癸卯諭內閣毛鴻賓奏請飭各路帶

兵大員將因事撤遣及告假回籍勇弁給與執照並知照地方官

以備查覈等語軍興以來各路軍營召募兵丁不下數十萬人其

志切同仇殺賊立功者固屬不少亦有會充匪類爲鄉里所不齒

一經投效漸保官階該勇弁恃有護身之符輒告假回家儼然以

職官自命不受地方官約束甚至野性未馴復萌故態地方官既

無可稽考各團紳雖有聞見亦且畏勢而不敢言黨與漸多擾害

鄉里亟應嚴行查辦以杜亂萌嗣後各路統兵大員所轄勇丁毋

論保至何項官階凡因事撤遣及告假回籍者均著給與執照將

事由限期開載明白一面行文知照各該地方官以備查覈如該

勇弁等有倚勢作威藐法橫行情事該地方官卽與齊民一體查

辦毋得以曾經打仗稍示優容其有未經告假私行回籍者既無執照又無各營知會卽著照逃勇例從重懲辦以肅軍律而靖閭閻將此通諭各路統兵大員暨各直省督撫知之○諭議政王軍機大臣等嚴樹森奏陝省漢回構釁實在情形一摺據稱漢回互鬪西同等處焚殺日甚若甘肅等省回民因而生心川匪從中勾結髮逆又復回竄勢必全省糜爛請飭瑛瑑選派素洽民心之牧令帶同漢回公正官紳前往理論一面嚴催多隆阿速入武關相機征勦各等語所奏與見辦機宜均相脗合見在回匪勢極鴟張非痛加勦洗不足以張撻伐至議撫一層亦必須將兇悍匪徒悉行殲戮其餘懾以兵威始能望風解散消患已形以眼前事勢而論正非區區口舌所能爲功也嚴樹森誼殷桑梓有所見聞自應如此陳奏以後如有續接信函關繫陝省確實情形者並著隨時

具奏將此由四百里諭令知之○諭毛鴻賓奏防剿黔匪連獲勝仗並楚勇官兵會剿恭城匪黨見在肅清並堵禦張高友等股匪情形一摺黔匪白竄陷天柱印水青溪各城擾及湖南晃州屬之涼傘貢溪一帶經湘軍連次剿辦究未大受懲創見在石阡等處數百里間無處無賊前諭韓超等派兵會同楚軍攻剿何以至今未見派兵田興恕是否出省如此因循怠玩置軍務於不顧殊出情理之外著卽酌派官軍前赴石阡等處相機進剿將失陷等城次第規復毋令蔓延該省與湖南處處毗連見在周洪印等馳抵晃州卽著毛鴻賓迅飭在事員弁通籌布置越境會剿以靖邊防其趙煥聯等五營兵勇並催令前往儻銅仁有警仍當分投堵剿無稍鬆懈粵西恭城土匪雖已肅清而平樂尙屬喫緊前據劉長佑奏稱親赴蓮塘察看軍情妥爲布置該撫辦事穩練務將被脅

猺人設法解散以孤張逆之勢會合毛鴻賓所派之軍迅速殲除
湖南粵西唇齒相依應解軍餉毛鴻賓務卽籌撥毋稍遲誤將此
由六百里各諭令知之○甲辰諭議政王軍機大臣等耆齡奏行
抵浦城防所業經慶端將閩省援浙各軍移交接統總兵秦如虎
等節次由青田等處剿賊獲勝溫郡肅清收復松陽宣平處州見
在賊勢已衰大股悉聚金華境內亟應乘機進剿等語耆齡由廣
赴閩遲滯至數月之久見在馳抵浦城接統慶端所部各軍本日
復經簡放閩浙總督臈茲重任應如何矢發天良力圖報稱著卽
督飭秦如虎吳鴻源林文察等軍及所帶粵勇規復處州郡城直
逼金華大張撻伐聯絡衢郡楚軍聲勢與左宗棠會合分路夾擊
以爲恢復全浙之計遂昌收復之後湯溪龍游兩縣尙有逆匪屯
聚迅卽催督林文察等軍奮力進攻此處一經得手卽與衢州聲

息相通緝雲甫經收復又爲另股逆匪竄入亦卽飭令道員蘇鏡
蓉激勵民團迅圖埽蕩溫處各屬民團義旗競舉耆齡等務當迎
機鼓舞毋得稍有遏抑以順人心而作眾志閩省邊境如福鼎等
處與浙江邊界毗連仍須防賊突竄以固疆圉慶端見放杭州將
軍一時不能到任著卽暫畱閩省防所幫同耆齡籌辦防剿臺灣
彰化匪徒未平總兵曾玉明等帶兵已抵鹿港設法進攻並著飭
令該總兵等迅圖殲事該督卽無庸回省一意剿賊以副委任將
此由六百里各諭令知之○以慶端爲杭州將軍耆齡爲閩浙總
督由廣東
巡撫遷○申諭步軍統領等衙門整頓京營嚴查保甲○乙巳
諭內閣曾國藩奏安徽巡撫李續宜丁憂應否賞假抑或准其開
缺請旨一摺李續宜自簡任巡撫以來辦理一切深合機宜當此
軍情喫緊之時勢難暫令離營該撫見丁母憂著卽在軍營穿孝

改爲署理巡撫毋庸賞假回籍加恩賞銀八百兩由該員原籍湖南省藩庫給發經理喪事並著毛鴻賓飭令該地方官妥爲照料墨經從戎垂諸古訓李續宜至性純篤諒必能體朝廷軍務爲重不得已而破格奪情移孝作忠以副委任其母再行瀆請仍俟軍務完竣准其奏請補行回籍終制俾遂孝思○曾國藩奏近日軍情曾國荃圍攻金陵之師與賊相持常有零股前來搦戰小有擒斬未聞大仗鮑超克復甯國後臣檄令進攻東壩高淳溧陽溧水句容一帶作遠勢盤旋而來然後屯聚金陵東北隅與曾國荃相爲犄角據鮑超呈稱軍士勞苦太久疾病甚多應請稍爲休息再行進兵其廣德州僞保王投誠一案亦尙未辦理妥適石清吉守廬州之十營經官文等調令南渡助剿金陵商之李續宜另撥數營接防廬州臣意李續宜方以全力經營苗黨自難分撥防廬之

師已咨覆官文等飭令石清吉仍守廬州無庸南渡袁甲三病狀
近日不知何如李續宜既須離營應懇 聖恩飭畱袁甲三駐紮
臨淮庶兩淮上下不至空虛 上諭議政王軍機大臣等從前胡
林翼在湖北巡撫任內丁憂曾經給假兩月回籍窈孝百日後仍
行署理巡撫惟此時皖省軍務方殷防剿事宜頭緒紛繁較胡林
翼在鄂時情形尤爲緊要李續宜若回籍兩月則皖北軍務無人
統攝深虞大局稍有鬆勁朝廷因李續宜威望素著倚畀甚殷且
皖北軍務乏人更替不得不仍令署理撫篆所有安徽巡撫關防
仍著曾國藩交還李續宜接收毋稍遲誤另片奏鮑超克復甯國
後見經該大臣檄令進攻東壩等處鮑超一軍進取機宜卽照所
擬辦理仍須速飭前進毋令久稽時日防廬之師曾國藩已咨復
官文仍令石清吉駐守毋庸南渡多隆阿雷正綰等軍止令其剿

辦豫省南陽一帶賊匪諒不久即可蕆事以後多隆阿等軍或須駐防廬郡一帶或須赴江南會同進剿均著曾國藩酌量調度迅速奏聞將此由六百里各諭令知之○曾國藩等奏福建水師提督楊載福請更名岳斌報聞○以黃贊湯爲廣東巡撫未到任前仍以兩廣總督勞崇光兼署以譚廷襄暫署河東河道總督由山東巡撫署○丙午彗星見西北方○諭內閣議政王軍機大臣會同禮部奏擬請舉行 升祔典禮一摺本年九月初九日 皇考文宗顯皇帝 皇妣孝德顯皇后梓宮奉移 山陵距永遠奉安之期爲時尚遠 皇妣孝德顯皇后神牌已於咸豐三年照例供奉 奉先殿 皇考文宗顯皇帝神牌若俟永安 山陵後始行同時升祔歲月稽遲殊無以妥 先靈而昭誠敬朕心實有未安 文宗顯皇帝神牌卽於 奉先殿神庫內擇吉恭製並謹將 孝德

顯皇后神牌漆飾改題恭書 廟號一併先行 升祔 奉先殿
俟將來 山陵永遠奉安禮成後再行 升祔 太廟該衙門其
詳查典禮敬謹遵行○諭欽差大臣科爾沁博多勒噶台親王僧
格林沁公忠夙著威望聿隆著統轄山東河南全省軍務並調度
直隸山西兩省防兵直隸山東河南山西各督撫提鎮以下各官
及正白旗漢軍副都統遮克敦布禮部右侍郎毛昶熙署漕運總
督吳棠均歸節制其蒙亳徐宿等處防兵並著一併調遣所有勦
匪事宜卽著會商欽差大臣李續宜妥爲籌辦肅清北路迅奏膚
功該大臣其欽承朕命毋許固辭○諭議政王軍機大臣等恭親
王等奏遵議改設長江通商大臣一摺各國於沿海五口通商均
有舊章可循而長江上下計有二千餘里地處腹心事關創始自
應將通商大臣改駐長江著會國藩於鎮江金陵或漢口九江擇

一扼要之處咨商薛煥酌量具奏至通商大臣廉俸以及委員差役並沿江口岸應否設立行館之處卽著會國藩薛煥覈實議定未可稍涉浮冒其上海及長江一帶中外交涉事件固應歸通商大臣專管而粵閩浙三省事務通商大臣亦應兼理以免岐異薛煥覓在辦理比利時國換約事宜著於事竣後或親赴長江沿途察看或江面向難行走卽由會國藩酌定會同具奏候旨遵行原摺著鈔給閱看將此由五百里各諭令知之○譚廷襄奏查兗州在泰安西北沂州在泰安東南其間峻嶺崇山不通大道卽係教幅各匪窟穴臣先在泰安布置山湖兩路防務原擬前赴沂州先清幅匪再辦教匪以杜勾結然必須曹濟安靜兗州無警方能東行乃臣至泰安後卽聞教匪於前月二十九日出掠泗水一帶係因曲阜防兵南移滕嶧之故臣隨派遊擊謝炳帶勇馳往曲阜該

匪聞有兵來卽日回巢復於本月十二三等日南擾鄒縣界河一帶劫掠糧草以爲固守之計兗州距賊踞之鳳皇山僅七十里實係前敵之他並非無賊臣斟酌再三設赴沂州而兗州教匪猖獗其勢不及回顧又因僧格林沁來函亦以北路爲慮是以改道赴兗一面派員前往沂州會同在事文武籌辦勦撫幅匪機宜隨事稟商尙屬順便且於曹濟滕嶧相距較近亦可兼防臣至兗州後連營進紮並派隊駐郡南五十里之鄒縣總扼教匪西出之路以資截勦該處近山地面早已蹂躪不堪眾情迫切望兵甚急臣若遽去恐拂人心至沂州匪圍除已克復外蘭山三十一處費縣十二處人數多少不等負隅固守逐節圍攻旬月之間尙恐不能蕲事卽或議撫亦非旦夕可成然揆度情形教匪勢合勦辦較難幅匪勢分勦辦稍易臣前次摺內聲敘勦辦教匪必須東西兩路並

進不過希冀攻入山內得有把握其實西路之防禦不能待東路之肅清臣任以一身無可諉卸亦無可選擇見在教匪恐幅匪就撫爲官兵作內應不肯招接尙未聯合蘭山縣於本月初七十三等日兩次進攻匪圍臣復添撥勇隊四百名由泰安前往協助俾令逐漸掃蕩茲臣奉旨仍進紮兗沂適中之地以期東西兼顧臣覆加查覈適中卽無可駐之處見已逼近賊巢似應就兗顧沂設或沂州緊急須臣親往再爲酌度前進再副都統德楞額於本月十五日夜間同署嶧縣知縣張振榮進攻雲谷山匪巢平毀賊寨二層先後斃賊數十名尙有裏圍未克仍設法進攻至會匪王廣繼被勦遁入費縣抱犢嶗一帶臣已飭令駐費一軍探明迎擊並咨德楞額趕緊追襲務殲醜類以淨根株上諭前因該撫奏稱先勦蘭費一帶幅匪再行會合夾擊教匪兗州距蘭費較遠是以

諭令該撫仍遵前旨駐紮兗州適中之地以期東西兼顧茲據奏稱教匪累次出掠勢甚猖獗已派隊駐紮鄒縣扼其西路教匪倚鳳凰山爲巢穴若派得力員弁嚴密堵遏再行設法進攻期辦更易爲力沂州匪圍聞不下數百處雖進攻間有斬擒究未大受懲創著譚廷襄派撥兵勇並各路防兵迅圖殄滅該撫仍當權衡輕重酌度適中之地駐紮以期居中調度呼應較靈雲谷山匪巢裏圍未克會匪王廣繼遁入費縣一帶並著咨會德楞額等力圖攻克將逃踞各匪悉數殲除勿令蔓延爲患另片奏大名縣人王叔詰在館陶縣辦理團練糾黨多人在臨清州所屬之尖莊下堡寺亮團經該州知州擒捕逃逸前據文煜奏威縣餘匪聚眾意在下堡寺會齊是否該練眾人數過多駭人聽聞抑另有股匪嘯聚著文煜譚廷襄確切查明不可含糊了事王叔詰辦理河東河西團

練據稱良莠不齊難保無匪徒溷迹其中希圖滋事著一併查明覆奏儻王叔詰辦理未協卽將該練總撤退另派公正紳士將練眾妥爲鈴束勿令散漫無紀別滋事端將此由五百里各諭令知之○諭勝保鄭元善奏南陽郡圍已解髮逆西竄見已督軍繞出賊前盡力兜剿一招據稱逆匪圍撲南陽總兵圖塔納等協力固守經勝保鄭元善調派王佐臣盧得勝等督兵援剿湖北襄陽道金國琛越境來援圖塔納等出城夾擊賊勢不支敗向西北山中逃竄城圍立解等語此股賊匪一聞大兵兜剿紛紛奔竄難保不乘虛復入陝境勝保已飭成祿等星夜改道由盧氏靈寶閿鄉繞出賊前迎剿卽飭令痛加截擊該大臣旣由襄城前進自可直趨陝州徑入潼關著卽督飭各軍奮力截擊並著鄭元善嚴飭盧得勝等軍視賊所趨跟蹤追剿俾該逆喘息不定則殄除較易勝保

等所稱多隆阿一軍亦必由西南追躡惟正西一面與秦接壤見
尙無兵扼截多隆阿見在駐軍何處著官文酌量緩急卽飭該將
軍督率所部扼要截剿雷正綰一軍見在隨聚並著官文飛飭該
鎮繞出賊前迎擊鄭西防兵相距較近著官文一併酌量調派飛
速堵遏金、琛所帶兵勇已抵南陽卽可乘此聲勢會同鄭元善
派出各軍併力攻剿務將此股逆匪悉數殲除毋令竄入秦中勾
結回匪爲患潼關扼秦豫之衝勝保入關以後應否畱兵駐守著
勝保鄭元善會商妥爲布置總兵馬陞已簡放太原鎮晉省防務
喫緊且少統兵大員著勝保卽飭該總兵速赴新任以專責成陝
省望援甚急該大臣膺茲重寄必當奮勉圖功大張撻伐不令楚
軍獨擅其長實所深望其南陽府城文武員弁固守待援不無微
勞足錄著勝保鄭元善擇尤酌保數員毋許冒濫將此由六百里

各諭令知之○命欽差大臣勝保督辦陝西軍務○丁未左宗棠

奏前因衢州南北兩路喫緊臣由開化回軍五月初四日馳抵衢

州詢知侍逆李侍賢糾集賊黨由龍游蘭谿壽昌上犯於北路峽

口一帶聯營三十餘座並盤踞杜澤雲溪等村又令嘏天義李逆

等於南路石室街築成四壘東路大洲全旺安仁埠等處各築數

壘相爲犄角臣察北路地勢緊連遂安開化常山賊勢較重適江

西撫臣調屈蟠王德榜兩軍赴浙會剿臣當飭其會合總兵劉培

元一軍進駐江山以防石室街之賊親率各軍由北路進剿其東

路安仁埠一帶之賊飭總兵郭起舉等憑河堵截十三日臣率各

軍進紮雲溪十五日分三路進攻裏外黃蓮花等處賊巢楊昌濬

等營由右路進劉典等營由中路進李耀南等營由左路進崔大

光等營從後接應我軍右路南至艮山涼亭而蓮花洋塘盈川之

賊先已列隊田壘並挑悍賊數千過河而陣張聲恆率勇先進槍礮排擊賊即敗退追至田壘賊復張兩翼來鈔我軍悉力抵禦斃騎馬賊目數人賊勢稍卻乘勝追至河邊侍逆李侍賢揮騎賊向前衝突楊昌濬率親兵往來堵禦斃悍賊數十人適我軍由左路進攻峽口者斃賊二百餘人破賊壘三座楊鼎勳復由蓮花過河燒賊大壘一座殺悍賊數十人侍逆知左右兩路俱敗紛紛遁走我軍追數里始整隊而還六月初七日臣飭劉典督軍由左路進攻裏外黃之賊楊昌濬督軍分別艮山涼亭一帶會攻蓮花洋塘盈川之賊我軍左路行抵童村山上瞭見外黃村莊甚大賊壘堅固劉典遂揮各營嚴陣村前裏黃外黃之賊見我兵無多蠢擁而來我軍各路齊進無不以一當百賊敗退入壘然放槍礮我軍踰濠而入賊勢不支適楊鼎勳等所部由峽口繞至外黃後山揚

旗而下羣賊驚駭棄械狂奔中右兩路見左路得手卽乘勢分道
進攻蓮花壘中之賊亦悉遁走追奔二十餘里將沿途賊壘踏平
是役斃悍賊數百名生擒六十名救出難民以數千計下自盈川
上至裏外黃數十里間賊壘三十餘座一律踏毀其南路石室街
東路大洲之賊聞北路賊巢旣破驚怖殊甚初九日劉培元李定
太會同屈蟠王德榜各率所部由南路進剿賊聞官軍大至棄壘
狂奔各營急起追之大洲之賊亦遁沿途斃賊百數十名衢州東
南兩路賊壘亦一律踏毀淨盡敗賊紛竄龍游蘭谿查首逆李侍
賢自五月十五日經官軍擊敗後是夜由龍游退回金華嗣竄永
康近又有竄湯溪之信賊蹤飄忽靡常意在鈔襲臣軍後路臣先
擬衢州江山兵力足資堵截卽當由壽昌淳安直擣嚴州以規省
會近探杭州守賊無多賊之大勢趨重金華自應併力先將龍游

壽昌蘭谿湯溪等處次第攻勦撤其藩籬卒其巢穴然後分兵嚴處以收破竹之勢蔣益漣所部十七營已抵湘南臣又飛札催之到浙約在七月臣軍新募之勇已陸續前來劉培元所部三千二百人見正造船調礮添設水師一俟就緒相機布置又奏台州地瘠民強上年逆首李侍賢竄陷後分遣逆黨散踞各縣爲縱橫海上之計李侍賢旋以官軍入浙急思抗拒乃由台州回竄金華賊目李鴻釗等在台大肆淫掠士民不堪其毒因倡義討賊各相糾率出賊不意擊之旬日之間連攻郡邑斃賊五六萬賊目皆就擒斬出力士紳台黃以道員蘇鏡蓉爲最仙居以副貢生吳琮爲最而吳琮以其父被害殺賊報仇英烈之風尤足矜式鄉里定海解圍後議克鎮海厥後克復甯波多得布興有布良有之力布興有在洋橫行有年熟習海上情形前浙江臬司段光清撫而用之以

護商旅此次陳世章張景渠用之亦得其力甯波既克敗賊遁入
紹興台郡既克敗賊萃於處郡溫州之賊畏台郡士民之乘其後
由處郡回竄金華就見在局勢言之裏賊中央絕其紛竄似亦浙
事一大轉機臣見飭代理台州府知府崑齡於赴任之便詳察各
處情形及實在出力士民分別安撫獎勵諭蘇鏡蓉吳琮等互相
聯絡以收眾志成城之效一面檄委署甯紹台道史致諤由安慶
雇坐輪船駛赴上海由定海鎮海以抵甯波察看情形並經理稅
釐事務是否堪以養兵若干隨時馳稟以便敷酌並調段光清及
甯波紳士陳政鏞隨同經理上諭內閣逆首李侍賢糾黨上竄
經左宗棠督軍分路進剿殲斃悍賊數百名生擒六十名救出難
民數千名踴毀賊壘三十餘座衢州地方肅清剿辦尙屬得手著
左宗棠親督各軍由龍游等處進剿次第克復各城其台州紳民

倡義討賊旬日間連復郡縣斃賊五六萬名賊目李鴻釗等悉就擒斬該紳民等敵愾同仇深知大義殊堪嘉尙著左宗棠傳旨嘉獎出力紳民兵勇並著查明酌保候旨施恩用昭激勸○諭前據巡撫毛鴻賓御史華祝三先後奏參貴州提督田興恕奏報不實縱寇殃民等情當經降旨交駱秉章秉公查奏嗣據該督奏稱田興恕自接任欽差大臣署理巡撫印務後意氣驕盈行爲乖謬被參各款實非無因等語田興恕前由湖南轉戰入黔歷著戰功其過人之才良可愛惜是以僅令其繳回欽差大臣關防毋庸署理巡撫仍以提督勦辦貴州苗教各匪被參各情悉置不問原冀保全始終使知悛改該提督自應奮勉圖功力贖前愆方不負訓誨成全之意乃自上年十二月間諭令帶兵出省迄今半載有餘而銅仁石阡等府匪蹤徧地竟未派兵攻勦該提督安駐省垣養尊

處優不復親歷行間並不遵諭旨殺害外國傳教並內地民人多
命虐及無辜如此任性乖張總由恃恩驕恣年少志滿不可不嚴
行懲創田興恕著先行交部議處卽著馳赴四川交駱秉章差遣
仍聽候駱秉章會同崇實等秉公查辦○會國藩奏鮑超圍甯國
之師六月初八初十等日屢獲勝仗十二日進紮城根十四日大
戰全勝殺賊極多卽於十五日克復甯國府城會國荃一軍派隊
進剿秣陵關等處兩次獲勝六月初六日援賊數千前來窺營隔
濠放槍各有傷損未經交仗而退聞援賊到金陵者已有數萬計
秋間當有大戰目下甯國已克鮑超之兵儘可援應金陵無孤軍
寡助之虞多隆阿將赴陝西慮金陵兵力太單頃接官文多隆阿
會咨已調駐守廬州之石清吉十營令其齊赴金陵爲會國荃一
臂之助今甯國已復鮑超之全軍足資游擊南岸之兵力足敷調

撥石清吉十營或可仍防廬州不遽南渡臣當與官文多隆阿函商妥辦湖州失陷後聞城中被害不過數百人道員趙景賢尙未殉節應俟查明實在下落再行具奏至甯國詳細戰狀俟接到鮑超文牘續行奏報李鴻章奏青嘉各城踞賊誘之既不來戰必須官軍移營進逼次第攻取爲先發制人之計臣密飭李恆嵩探明進攻青浦路徑於河港岐出處搭造浮橋以利師行派令副將程學啟滕嗣武通判韓正國等各率兵勇於七月初七日自虹橋拔隊前往北簞山距青城十餘里相地築營參將劉士奇郭松林各率所部紮塘橋後路又派李鶴章帶親兵馳往督攻初十日各營先後到齊又調副將華爾由松江帶隊來會定議進攻日內計可抵城容將攻剿情形再行續奏至浦東金山衛城克復後責成知府潘鼎新等以所部分駐要隘益以守備吳長慶一營勇目吳健

瀛三營歸併扼守

臣

復委臬司劉郇膏前往會商潘鼎新查勘海

塘及河道形勢加工濬修爲穩守計據稱海塘外灘宜開長濠塘

內地北舊河西接黃姑塘向南繞至金家橋東歸張堰大河節節

皆須挑濬俾河路曲折皆通水師可以駛入援應再勘得衛城東

面海塘受潮怒激塘埂衝騰不過幾尺勢甚危險已飭籌款趕緊

修築藉地利以省兵力又奏前欽奉諭旨飭

臣

派員防守太倉常

熟江陰各口杜賊擾及裏下河等處查江防大段由靖江而上至

瓜州爲內江由靖江而下至海門崇明爲內洋自瓜州至泰州五

六百里向皆責成各水師分防其南岸之江陰口福山口徐六涇

口楊林口劉河口賊巢密布游匪劣勇逋逃句結

臣

疊咨黃彬並

飭李德麟等設法堵剿六月間江洋盜劫之案日凡數起

臣

商調副將華爾帶輪船隊伍於七月間出吳淞口就近剿劉河賊巢毀

賊卡三處攻奪該口內新老兩鎮救出商船三十餘隻難民數百人斬髮逆七八百人其自楊林口而上接連通靖江港紛錯可以偷渡者何止十餘處竊意江南全局鮑超由東壩進曾國荃由金陵進秋冬後賊必不支上游無隙可蹈恐併出南岸各口就食於裏下河州縣而狼福江面遼闊一經偷渡衝入通如卽成噬臍之患臣每與督臣曾國藩緘商深爲焦慮署提臣黃翼升所帶水師皆長龍三板於洋面風潮沙性實不相宜見在暫畱副將陽利見蔡東祥所部四十船巡防三江口兵力單薄勢難兼顧他處其餘一百數十號調入松江泖澱各湖尙不敷用曾秉忠礮船見已裁撤大半合之黃翼升新營祇可專力湖防至於通靖江防應仍責成黃彬所部師船嚴扼北竄計年內外赫德購到船礮定可得用或俟九洑洲克復由督臣曾國藩商之楊岳斌彭玉麟分軍下駛

則一切皆資整頓不獨爲外江內河設防已也惟目前別無救急之法可否飭下都興阿黃彬安籌布置嚴飭諸鎮將實力防禦通靖泰興各口岸儻有疏虞俾賊闖入裏下河卽惟分防之鎮將是問再上年都興阿黃彬請調廣東紅單船四十號所需餉項見實無款可籌查水師各幫內原雇紅單船七十七隻兼之大洋艦快蟹挖營各項戰船共三百餘號目下縱有抽減如以船身稍舊者碇泊駐防以其堅固者出江堵擊似尙足敷調撥應請飭令都興阿黃彬暨廣東督撫臣將前調紅單等船四十號卽行停止如已報啟程無論駛至何處卽令折回毋庸來江以節糜費又奏蘇州逃出僞職劉萬東來營投誠臣面加訊詰據供親見僞天王洪逆於六月二十八日由南京挈眷移至蘇城改蘇郡曰天京僞忠王李秀成自將各軍往金陵援救聞東壩溧水俱被官軍攻破等情

無論此言確否賊勢已形衰散左宗棠蔣益澧各軍擬由衢州分進金嚴浙東米糧缺乏僞侍王李侍賢一股似難逞志僞忠王擁眾數十萬將來如由金陵敗回勢必合股另圖竄踞松滬與蘇州接壤已飭水陸各軍嚴密堵剿 上諭議政王軍機大臣等會國藩奏鮑超克復甯國府城瀝陳林福祥等先後赴浙李鴻章奏官軍進攻青浦並金山設守情形及釐定鎮餉章程各摺片鮑超一軍既已克復甯郡自可由東壩等處與會國荃會師金陵會國藩既不慮孤軍寡助似大局已有把握深堪欣慰據李鴻章奏秋冬以後賊勢不支恐併出南岸就食於裏下河州縣所言不爲無見多隆阿雷正綰等應否分撥一軍前往扼紮之處並著會國藩妥籌具奏又李鴻章奏據蘇州投誠之劉萬東供稱洪逆於六月二十八日由南京挈眷來蘇李秀城自率羣賊往金陵救援如所供

果實是賊勢已形衰散著會國藩速飭會國荃等設法進攻迅圖克復該逆巢穴既破則蘇郡踞匪勢成釜底游魂其林福祥米興朝恆起等據左宗棠奏該員已先後赴營投到惟況文榜吳再升陳步高貴廷芳尙未解到請飭速解已諭令左宗棠就近審擬辦理除貴廷芳陳步高二員本日據會國藩奏見經解到皖營卽著會國藩訊明分別懲辦外其況文榜吳再升二員並著李鴻章查明速解左宗棠軍營李鴻章密飭參將李恆嵩探明進攻青浦路徑派令程學啟等各率所部進攻又調華爾由松江帶兵來會兵力不爲不厚著卽激勵該員弁等直抵城下務將青浦縣城趕緊克復其金山衛城並著嚴飭知府潘鼎新等慎密防守衛城東面海塘被潮衝激勢甚危險卽著籌借款項分別修築至鎮江軍餉以沿江釐捐上海協餉口岸鹽釐爲三大宗除照向章撥給各營

外所有各項進款以五成歸鎮營四成歸水營其餘一成提爲水陸兩營製造軍火並臺局委員用費均著照該署撫所擬辦理將此由六百里各諭令知之○諭李鴻章奏請嚴飭水師鎮將防守江面並前調之紅單等船請卽停止一摺甯國郡城業經鮑超克復該提督已由東壩等處會合會國荃各軍進攻金陵該逆被剿窮蹙勢必渡江奔突裹下河各州縣亟宜嚴密設防以保完善著都興阿等速飭水師將通靖泰興各口岸實力防禦晝夜梭巡毋得稍有疏虞致該匪乘間偷渡至所調紅單等新船入江而舊船仍未能卽撤見當蘇餉艱窘勢難再議增添且紅單船水勇多係粵省亡命之徒與粵匪難免熟習勾通等事前此江南用之有害無利當此軍情得手大局已有轉機尤宜慎益加慎都興阿向能通籌大局著察看情形如前次奏調紅單等船四十號可以毋須

來江卽著迅速奏請停止一面行文廣東督撫截追回粵再李鴻
章片奏沿江自儀徵至通海各口該水師鎮將自行設卡三十餘
座如能滴滴歸公當可敷用而近來所收月不過二三萬兩等語
著都興阿嚴加整頓飭令該鎮將等覈實收放嚴禁侵漁中飽等
弊以裕餉需而資接濟將此由六百里諭令知之○諭左宗棠奏
攻剿衢州三路賊壘地方肅清並台州甯波郡縣克復溫郡漸次
安堵各一摺覽奏甚爲欣慰逆首李侍賢倚金華爲老巢嚴處爲
犄角該撫本擬由嚴州進規省垣見因龍游等處賊黨分布擬先
撤其藩籬犁其巢穴然後分兵嚴處以收破竹之效隨機決策甚
合機宜卽著由龍游等處進剿若金華克復則規取省城更易得
手劉培元一軍抵浙後造船調礮添設水師亦屬軍行必不可少
卽檄令妥爲辦理該撫旣知蘇鏡蓉吳琮最爲出力布興有等頗

能勦賊不妨奏請獎敘藉以收拾人心不至氣竭情渙甯波雖地處海濱而於籌餉尙足取資本日已將史致諤簡放甯紹台道卽著飭令將稅釐事務妥爲經理前據慶端奏稱甯波克復係道員張景渠知府林鈞會同辦理張景渠旣經革職拏問林鈞尤不協民情著一併革職查辦另委賢員接署得與紳士聯絡於籌餉防守更爲可恃僅餉項可籌卽於楚軍內酌派前往以資進勦另片奏米興朝等到營分別審辦並湖郡失守自請嚴議等語米興朝等逃潰滋擾各情已屬罪無可逭而林福祥以方面大員覲然投賊尤爲罪不容誅著左宗棠於審明後應正法者一面傳旨先行正法一面奏聞庶喪心昧良之員不至久稽顯戮陳步高貴廷芳二員已經李鴻章解交會國藩軍營審辦如應有質訊之處卽行咨詢毋庸解赴浙江況文榜吳再升二員已諭李鴻章迅解浙營

湖郡雖係該撫統轄之地而隔於形勢無從救援情屬可原所請
交部嚴議之處著加恩寬免其失守情形並趙景賢等下落卽著
查明具奏將此由六百里諭令知之○諭前據總理各國事務衙
門奏田興恕起意殺害傳教民人等情當經諭知駱秉章等派員
密查尙未據詳查覆奏因思田興恕自二月間諭令出省剿賊迄
今半載貴東徧地皆賊並無一兵進剿聞其行步須人扶掖若不
稍加薄懲無以示儆因降旨將該提督交部議處飭赴四川差委
著駱秉章卽令將石逆悉數殲除用贖前愆該提督才堪造就素
爲駱秉章所用若經此次磨折或能愧悔悛改亦未始非教誨成
全之道此時需材孔亟著駱秉章檄調赴川悉心察看如果奮勉
圖功不敢任性妄爲卽著隨時具奏儻竟不能得力亦著據實馳
陳貴州提督一缺甚關緊要著駱秉章咨商韓超於趙德昌沈宏

富等員內何人相宜一面檄令暫行護理提篆一面具奏江忠義剛愎嗜利聞於大體雖不足當封圻之任而於田興恕軍營聞尙聯絡令接統其眾帶兵勦賊或可勝任著毛鴻賓卽飭赴黔署理提督篆務以資統率該員見在楚省帶隊能否赴黔並著迅速具陳再據左宗棠奏蔣益澧自廣東發稟所部十七營已早抵湖南見在浙省溫台衢甯等郡縣均已收復左宗棠急盼援兵攻勦金華著毛鴻賓迅將蔣益澧所部十七營餉需迅速籌備催令拔營前赴浙江聽候左宗棠調遣其蔣益澧欠餉並著勞崇光剋期籌給俾得迅速起程赴浙毋許再行延緩將此由六百里諭令知之○先是禮科給事中卞寶第奏軍務未平請飭定逃官議罪章程命議政王軍機大臣等會同刑部議奏至是議上嗣後各省督撫提鎮除失守州縣仍照統轄兼轄舊例交部議處外如遇省城及

駐紮地方不行固守輒卽聞警先逃者卽照失陷城寨本律擬斬監候聲明情罪重大應卽處決仍請旨定奪儻情罪重大必須於軍前正法者應請旨卽在軍前正法如有必須研訊情節再行定罪者仍拏問來京審訊其尋常失守一城一寨並無聞警先逃情事者仍照各本律辦理從之○諭刑部等衙門清理庶獄○予江蘇陣亡國子監學政夏寶全祭葬世職殉難郎中汪念祖府知事楊錫嘉等建祠○戊申諭內閣官文等奏官軍克復鄖西詳細情形一摺陝西山陽之賊盤踞鄖西經總兵彭炳武及雷正綰入陝之軍馳往截擊該逆聞風喪膽分股逃竄官軍整隊馳擊斃賊四千餘名救出難民四百餘人當將鄖西縣城克復鄖屬漸就肅清仍著官文等飭令駐防鄖郡各軍嚴密防剿搜捕敗匪毋畱餘孽○諭慶端奏克復景甯雲和兩縣並將平陽賊匪悉數殲除一摺

浙江賊匪竄擾景甯縣治被陷經該縣知縣營書勳等集團進攻
泰順民團越境助剿立將景甯縣治收復該逆復竄陷雲和縣經
知縣柯沅等奮力攻剿復將雲和縣治收復其瑞安屯聚大畧之
匪由湖石撲擾平陽縣城經革員張啟煊等督率兵勇迎剿斃匪
無算餘匪梟水逃逸仍著督飭各軍乘勝進攻迅掃逆氛毋畱餘
孽景甯雲和兩縣文武員弁於賊擾該縣時不能實力堵禦以致
被匪竄陷均難辭咎署知縣柯沅有無聞警先逃情事著耆齡左
宗棠分別查明據實參奏其平陽帶兵潰退各員弁著一併查明
參辦○諭議政王軍機大臣等官文多隆阿奏籌議馬步各軍分
道馳赴豫陝並調撥廬郡防兵助剿金陵一摺前因陝西省城被
圍緊急多隆阿尙在楚疆爲賊所隔是以諭令勝保由洛陽一帶
星速入陝督辦軍務多隆阿雷正綰諭令毋庸入陝本日據奏多

隆阿督率馬步由南陽各屬分道進兵先除潼關以外髮捻各逆保全秦晉要地見在南陽雖已解圍而匪蹤西向勢已蔓延該將軍未知見已行抵何處急須將南陽西竄之匪剿辦肅清仍候會國藩檄調駐紮爲金陵後路援應石清吉十營是否已到金陵廬郡亦係要地李續宜所部是否足敷分撥多隆阿雷正綰之軍應行駐紮何處最要之地著會國藩察度具奏另片奏擬飭李宗燾卽赴多隆阿大營辦理文案等語該將軍見在無須赴陝李宗燾卽可毋庸調營該員曾經胡林翼等密保其人品才具能否獨當一面應如何簡用之處著官文會國藩酌量具奏以備簡用又片奏多隆阿飭委驍騎校伊明阿等赴古北口採買馬匹請各處按數查驗免稅放行已照所請辦理前據嚴樹森奏內地回民多以買馬爲生見聞陝省回匪倡獫馬匹甚多誠恐販馬入關多帶餘馬

陰以濟匪請飭各路統兵大臣等嗣後購買戰馬遴派漢人前往或責令同民之有官職及家道殷實者承辦毋使散販經手以杜濟匪之弊等語所籌不爲無見該大臣等嗣後購買馬匹務須遴派妥實可靠之人並註明執照不得任其多帶餘馬爲賊接濟將此由六百里各諭令知之○以星變詔求直言○予浙江殉難鹽運使莊煥文湖北陣亡署知縣梁茂齡等祭葬世職建祠○己酉曾國藩奏浙江提督鮑超督率各營克復甯郡臣已先行附陳梗概聲明續報戰狀旋據鮑超文稱僞輔王楊逆堅伏城中糾逆黨四大股繞城結壘一曰僞保王踞城東之夏家渡孫家埠一曰僞天將踞城南之綠錦鋪畢衝鋪一曰僞八王踞城北之圖山廟埠洪村嶺楊逆自與僞桂王合股由城西之敬亭山連營至望城岡一帶以圖力拒我軍五月十五日嚮明鮑超先令婁雲慶等潛出

牌林岡陳得勝等潛出安宜口伏於望城岡後以韋志俊所部爲
遊兵仍令宋國永周有勝王衍慶數隊直取中堅以誘賊賊果輕
我兵寡壓岡而下甫及交鋒鮑超復令黃慶等十營張兩翼鈔來
羣賊勢阻將圖卻走瞥見城南城北之賊悉衆來援回鞭轉鬪不
意婁雲慶陳得勝等兩支伏軍突從山谷中騰蹕而前衝賊數段
韋志俊等營截斷賊後宋國永等揮軍乘之擒獲近五百人殲斃
踰八千人遂破望城岡並將抱龍岡等十數村落逆壘悉平東南
北三路賊衆亦卽棄巢紛竄退聚河西及河東北該逆旣受大創
負固自完鮑超四次挑戰匿不出巢遂於六月初八日統率馬步
各軍偪壘下寨賊不能堪由北城出萬餘衆迎拒我軍一擊敗之
初十日賊復由南城出二萬餘衆悉力撲犯我軍再擊又敗之十
四日僞循王魏超城僞于王洪仁玕等於南門胡靈山鱖魚山一

帶列隊冀襲我後僞襄王劉官方等於北門廟埧圖山一帶列隊希圖夾攻西門亦別出大股倚壘爲陣鮑超見賊已渡河遂飭婁雲慶等向北門進張應超等向西門進以韋志俊趨南門之左張遇春趨南門之右我軍各路並進搏戰踰時未遽得手宋國永黃慶躍入陣中先將中路之賊擊敗馬勝奎等將石橋二壘踏毀賊眾紛潰將過浮橋我軍焚橋截住幾無脫者南門旣已獲勝僞襄王一股瞭見南路火發遂棄廟埧圖山而遁適張應超等亦於西門告捷三路整軍來會集於小東門外十五日楊輔青復出大東門爲背城借一之舉鮑超率各軍驟進該逆一戰卽北狂奔六十里已近洪林橋矣楊逆復率馬賊二千餘人回陣返撲馬勝奎緊蹙賊後中槍而殞將士亦多損折鮑超令諸營徐列圓陣將該逆人馬環加勦洗楊逆單騎脫去城賊見楊逆一敗不返倉皇失措

我軍已自洪林橋收隊歸來直入東門立將府城克復前後斃賊
幾及二萬人生擒酋目三百餘名查甯郡一拔則江浙之門戶已
開金陵之機勢漸緊由是略取東壩會剿下游可無兵單之慮浙
江提督鮑超冒暑苦戰屢復名城厥功甚偉惟係專閫大員應如
何加恩之處恭候 聖裁至此次尤爲出力人員暨陣亡將弁相
應分別開列懇乞恩施其餘在事出力員弁兵勇容 臣查明專案
奏獎 上諭內閣曾國藩奏官軍克復甯國府城一摺浙江提督
鮑超親督諸軍冒暑苦戰屢復名城茲復攻克甯國洵屬戰功卓
著忠勇堪嘉加恩著賞給雲騎尉世職以示優獎○諭曾國藩奏
江西省民困未蘇請將州縣攤補銀兩懇恩豁免等語江西省自
軍興以來疊遭蹂躪見雖全境肅清而民力凋殘元氣未復該省
各州縣自道光二十五年以來豁免清查各案內應行攤補各項

銀兩節經前任督撫奏定分限章程責令各該州縣按限完交而州縣籌補之法仍不免借資民力甚或借奏攤名目科斂百姓賸削民膏殊非朝廷體恤黎元勤求吏治之意所有江西省道光二十五年豁免案內查出官墊民欠及攤補兵差經費等銀除已完外其未完銀九十六萬一千餘兩道光二十八年清查案內查出因公那缺銀除已完並巡撫司道府州應捐不計外各州縣未完銀十八萬一千餘兩咸豐元年豁免案內查出清查以前官墊民欠銀六十六萬七千餘兩清查以後續墊民欠銀三十四萬三千餘兩加恩均著全行豁免經此次豁免以後各該州縣既無賠累之苦惟當激發天良整飭吏治年清年款源源徵解如有藉口民欠以致額徵短缺者卽著該督撫查明嚴參治罪各該督撫亦當廉隅自勵於州縣無所濫取於民生自無所朘削大法小廉實有

厚望所有江西省錢漕如何定立章程著曾國藩沈葆楨會同迅速妥議具奏○諭議政王軍機大臣等勞崇光奏查明恩平等縣土客互鬪原委並密陳辦理爲艱情形各摺片廣東恩平等縣土著與客民互鬪地延八縣事閱九年前聞該處有因互鬪戕害彈壓委員等事寄諭垂詢茲據奏稱土客宿怨深仇又各有所藉口操之過蹙則其燄愈張辦理稍偏則禍激益烈又值各處土匪散勇夾雜其中清理尤非易易惟有剴切開導先禁鬪狠俾客籍得以散歸再行分別曲直嚴懲首惡解散附從一面清還田產立約聯和等語自係實在情形著卽認真實力辦理飭令各該地方印委各員並公正紳士善爲曉諭總以分良莠不分土客一語爲持平辦理之要滇省回漢釀禍已深與粵省土客情形究有區別滇回異教本與吾民不類粵之土客則本皆良民仇讐有所自開鬪

很有不得已其愚頑甚可憫傷能得公廉仁恕官紳委曲開諭俾
釋干戈而登衽席小民當未有不樂從者惟其勢已積重難返且
恐其中難免奸宄之民乘機煽亂益相固結誠如該督所奏必先
行設法解散良莠始可得而分見在新會已經無事開平等土民
稍知斂迹陽春客民亦漸解散獨新興尙有屯聚該督業經選調
督標官兵及肇協之兵派員統帶以資彈壓如果有固執不悛有
心抗違者自應示以兵威俾知震懾一經馴順卽當悉心開諭使
之止息鬪爭各歸鄉里並卽豫籌善後之法以靖地方而安良善
香港澳門華洋雜處奸匪易藏尤不得以查無奸細匪船潛蹤遽
弛巡緝省城及各海口礮臺緊要亦應隨時豫爲籌畫修復之方
毋徒畏難苟安致忘不虞之備信宜匪踞經年陳金缸尤爲兇逆
著該督迅飭帶兵文武集團添勇速行勦辦毋任稽誅久踞轉成

蔓延將此由五百里諭令知之○諭毛鴻賓奏粵黔賊勢日張調
派兵勇出境援剿一摺據奏粵逆張高友久踞蓮塘官軍疊剿未
甚得手並分黨數千竄出陽朔恐劉長佑督軍赴潯後路餉運爲
賊斷絕全州灌陽又有土匪竊發擬令江忠義率所部入粵掃除
陽朔平樂各匪俾劉長佑得專力潯州至黔匪在晃州邊界肆擾
屢被楚軍剿擊而賊計狡逞四出奔突黔省之兵尙未出境會剿
毛鴻賓見飭總兵趙福元同知戈鑑等軍並辰州常德等師船扼
要分紮一俟調赴靖沅各軍到齊卽催入黔將印水天柱各城瓦
寨等巢一律掃蕩所籌甚合機宜且能顧全大局於鄰省毫無畛
域之見惟江忠義昨已寄諭毛鴻賓飭令赴黔署理提督篆務自
難復令赴粵著毛鴻賓卽飭江忠義迅赴貴州提督署任粵省軍
情緊要毛鴻賓所籌越境助剿之處極中竅要如湖南在籍臬司

陳士杰記名道趙煥聯等均可酌量就近派往卽著妥爲籌畫並
著劉長佑仍督粵軍與楚省官軍聯絡籌商將陽朔恭城梧州等
匪分合攻剿易元泰等與蓮塘之賊相持已久究竟是否得力務
須實力稽查責其成功毋任玩延田興恕調赴川省韓超更責無
旁貸若再將轄境之賊盡委客兵不思派撥兵勇會合剿辦或任
意遷延一聽地方糜爛毋謂朝廷寬典之可幸邀也將此由六百
里各諭令知之○以復浙江松陽宣平兩縣功賞總兵官林文察
提督銜○曾國藩奏江蘇藩司曾國荃督軍東下直逼金陵五月
十二十三等日賊匪乘我營寨未成糾眾二萬猛撲傷營勇十數
人我軍分左右兩翼鈔出斬獲二百有奇賊乃紛潰劉永祥追躡
騎馬賊酋中槍殞命二十二日探報秣陵關之賊擾及六郎橋一
帶大掠民糧曾國荃潛遣周日昇等各率騎隊出賊不意邀截於

朱門外賊黨棄糧思遁楊鉞南又自右馳繞其後縛賊數百悉斬於陣盡奪米穀以給村民自賊之數爲我敗也闔城惶懼飛書招援有僞王宗李酋糾集悍黨來自蘇州於六月初六初十等日兩次窺營火器對轟互有損傷張勝祿爲槍子洞穿左足曾國荃既惜傷一健將而賊計甚狡料數日內必有戰事豫飭各營密爲戒備果於十六日城賊援賊出四五萬人分撲各路營盤中路悍賊猛撲雨花臺一帶長濠我軍堅守營牆憑濠穩擊傷斃極多賊裂旗裹尸昇之而行曾不稍卻其犯公字敏字兩營者已焚哨棚而進其犯副後南後兩營者亦將踰卡橋而登劉連捷等見有黃衣騎賊指揮督陣猛鷲無匹潛然巨礮一發而殪卽乘羣賊靡亂派隊出卡併力掩擊立解重圍維時西南一路賊勢方張鄧蘭亭力戰死之崔文田等拔卡而出馳斬二賊目遂與劉聯捷所派之隊

合軍追勦計殲賊近二千人擒賊踰二十名訊據供稱是日之賊
實斃僞官數十僞對王亦在其中由是賊膽愈寒軍心愈奮曾國
荃正在冒雨修營徐圖進取乃甯國克復後餘匪竄併金陵嘯聚
於雄黃鎮者眾約二萬二十四日夜間句合城賊謀襲我營或以
大隊分伏濠邊或以另股鈔出營後天甫向曙一齊揚隊直撲易
良虎等令各勇穴牆施礮使不得近伺賊稍懈突出擊之倉卒交
鋒返奔弗及半就誅戮東路圍攻副後南後長勝等營之賊亦經
劉連捷等引軍擊走俘馘無算查洪逆以官兵爲數無多常挑悍
賊前來撲營我軍苦戰堅守時歷兩月布置漸固即可徐謀攻取
提督銜總兵張勝祿謀勇兼備轉戰湘鄂江皖以達江蘇五省數
千里之遙疊建殊勳乃因搶護營壘卒中槍子猶復負創強起力
籌攻守不數日因傷殞命實堪憫惻合無仰懇 天恩准將提督

銜總兵張勝祿照提督陣亡例議卹並從祀湖南長沙府湘鄉縣
各該處昭忠祠遊擊劉永祥擬保遊擊都司鄧蘭亭應請均照遊
擊陣亡例議卹奏入命予張勝祿等祭葬世職入祀昭忠祠○曾
國藩奏攻克甯郡後派兵追剿敗匪隨收復甯國縣城見在進攻
建平尙未得手並有僞保王童容海驍勇善戰本係石達開死黨
上年由汀州入浙隸李秀城隊下此次來援甯郡屯眾數萬於孫
家埠與官軍未開一仗遣人乞降稱與羣賊有隙願取郡縣縛輔
逆以獻鮑超與之期約許以自新乃撫事未成甯郡已克童容海
徑往廣德於二十日襲取州城又稟明鮑超申言率眾六萬就撫
由鮑超專差請示前來臣檢查本年正月間上海接獲僞文童容
海擅殺各酋十餘人賊中猜忌是其自拔來歸情尙可信惟人數
太多後患孔長已令鮑超酌留二千餘人則全行遣散未知該酋

童容海果否就我範圍如其撫事有成則賊黨去一大支皖南可以肅清於大局不無裨益報聞○予安徽陣亡副將馬勝奎祭葬世職○庚戌諭內閣左宗棠奏遵查失守文武情罪較重之大員先行定擬請旨遵行一摺據稱已革浙江布政使林福祥於到任後紮營江口迨檄調入城省垣被陷林福祥避入滿洲營嗣滿洲營又陷該藩司展轉逃至江南提督曾秉忠營盤旋即逃赴上海已革提督米興朝於杭城失陷後亦復由桐鄉等處逃至李恆嵩等營內本年正月間逃至上海所供逃避情形歷歷如繪請旨辦理等語林福祥米興朝以文武大員疊受 文宗顯皇帝厚恩不數年間擢任提督布政使苟天良未泯自應於杭城失陷時卽行憤烈捐軀乃巡撫王有齡將軍瑞昌等先後殉節而該革員等目睹情形恬不知恥仍復展轉逃匿忍辱偷生希求苟免若不從嚴

懲辦何以肅軍律而正人心林福祥米興朝卽著在衢州軍營正法免致久稽顯戮已革杭州織造恆起雖非守土之員而隨同避匿罪實難辭左宗棠所請發往軍臺效力尙覺寬縱恆起著改爲發往新疆充當苦差用示衡情執法辟以止辟之意○左宗棠奏六月十一十二等日先後列隊龍游對岸兼察地勢城賊鼠伏不動十五日遂安謀報有大股賊由嚴州淳安而來前隊至遂安東亭四部地方沿途賊館聯絡數十里臣以逆首李侍賢最稱狡悍此次賊多且疾必此逆親來無疑當飭防守遂安之卽選道王文瑞率所部老湘營嚴守城壘密飭臬司劉典率馬步九營倍道馳援一面飛飭知府魏喻義率桂勇二千由常山取道華埠扼紮昏口防其上竄又飭江西道員屈蟠等由西安常山出華埠截之蓋以李逆詭計始終以就糧江皖斷吾餉道爲主雖屢經痛創奸謀

未嘗息也十八日李逆率悍賊數萬攻撲遂安縣城王文瑞飭各營穩守待賊撲近令楊德泰等驟放大礮轟斃騎馬賊目十餘名賊勢轉而南趨適赴援之左營三哨先由僻道馳至賊駭而奔王文瑞開壁迎之與援軍合隊由西門出擊斃賊不計其數東路之賊見我軍由西路出擊渡河來撲東門復經康榮詔等擊退共斃悍賊一千餘名少頃援師大隊畢至各收隊而還二十日劉典督各營由遂安南路進剿行至三多麥田地方李逆出悍賊千餘名接戰賊盡伏於對岸山內圖俟我軍過河卽分路來鈔劉典飭黃有功等督隊分路迎剿斃賊數十名後路之賊蠢擁而至哨長郭文彬力戰死之官軍勢漸不支李良平楊鼎勳楊和貴率所部橫截而出立斃長髮悍賊數十名賊始敗遁官軍蹣跚緊追沿途斃賊二百餘名李侍賢自兩次擊敗後遂於二十二日夜間由壽昌

同竄金華劉典派馬隊追勦僅斬其拒後悍賊三十餘名接獲賊中僞文言金陵急須援救然必先將衢州官軍擊退始可前往見探該逆回竄金華修濬城濠盡調各路悍賊歸併金華湯溪蘭谿龍游武義等處拌命抗拒臣拜摺後卽進攻龍游蘭谿湯溪規復金華仍飭王文瑞嚴守遂安魏喻義駐昏口以防旁竄至諸將士奮勉用命備極勞瘁可否由臣擇其尤爲出力者彙案保奏上諭左宗棠奏官軍馳援遂安擊退大股賊逆一摺著左宗棠督飭各將士分路進攻規復金華毋令逆匪久踞所有尤爲出力員弁著准其彙案保奏○諭議政王軍機大臣等徐之銘奏密陳滇省撫局大概情形並林自清赴川沿途滋擾及擅殺知縣各摺滇省漢回構釁已久見經馬德新等和解省垣安謐澂江等處亦經委派文武員弁到任惟迤西大理一帶尙未和協著徐之銘速飭馬

德新等妥爲開導母任再行構毀林自清年少任性不知法律該撫所陳自係實情前諭駱秉章等妥籌調遣該督諒有設法安頓之策俟奏到再當諭令察看也另片奏鄧爾恆被戕情形並鈔錄張亮基致何有保信呈覽此事虛實見在無從查辦該撫無煩過慮惟滇省久經蹂躪民不聊生該撫務將澂江等處妥爲安撫俾民生得資安集其鹽井各項應辦事宜次第經理庶於餉項藉資接濟各省協餉雖飭戶部嚴催恐解到有需時日莫若於本省暫行籌畫永昌府及龍陵騰越兩廳失守該郡距省較遠兵力不敷救援情尙可原徐之銘自請議處之處著加恩寬免該撫卽勦撫兼施迅圖克復該府廳文武員弁殉難情形並實在下落及同時遇害死事紳民均著查明分別辦理雲龍州失守情形著一併查明具奏將此由六百里諭令知之○諭徐之銘奏密陳滇省撫局

情形及鄧爾恆被害實情又韓超田興恕查明滇省見在情形及何占標被戕原委各一摺滇省撫局據徐之銘奏稱全賴馬如龍等辦理安撫事宜見在同漢相安惟迤西大理一帶主事者杜汶秀尙須設法開導如其抗拒馬如龍情願帶兵勦辦等語馬如龍如果誠心就撫何以韓超等探得該總兵出示仍用大元帥字樣且欲阻潘鐸張亮基入滇並有如立意赴滇須撤去兵眾止須隨帶百餘人解餉而來之語其狂悖情形實堪痛恨鄧爾恆在曲靖被戕有無主使之人雖未可知而徐之銘則歸罪於何有保且稱鄧爾恆在鹽道署中被劫受一刀傷又在南門外亦被一桿不知其人仇恨何以如此之深意欲歸咎於鄧爾恆被人仇殺又欲將何有保調赴北省拏解審辦其情詞閃爍參差皆出情理之外所錄張亮基寄何有保一信是否實有其事著鈔給張亮基閱看據

實奏聞林自清勒派捐輸恣行強暴據徐之銘奏伊欲來滇民情忿怒必仍堵截請將其調赴軍務省分交大臣節制其意似因林自清業經就範恐張亮基挈之赴滇非其所利著潘鐸張亮基察看情形是否林自清真有不能回滇之勢或須咨會略秉章畱於川省差委均著酌辦至所稱林自清將失守城池之呈貢縣知縣許正裕奉差逗畱之署易門縣知縣周行釗二員正法自應治以專擅之罪第徐之銘必俟林自清到川後始行具奏是林自清在滇時徐之銘意存消弭已可概見並著潘鐸張亮基於抵滇後一併彙入前案確切查明據實參辦韓超等摺著鈔給閱看馬如龍欲阻潘鐸張亮基入滇以民情疑懼爲詞稟請撤去兵眾是欲令該署督等減從入滇遂伊等脅制之計潘鐸張亮基仍須詳細斟酌不可墮其術中將此由六百里各諭令知之○諭薛煥奏比利

時國通商條約議定畫押辦理甚爲妥協見在條約既經公同畫押自應於屆期互換諒該公使包禮士業已回國矣前諭薛煥於辦理該國換約事竣後候旨回京惟通商大臣見尙未可裁撤擬改移長江以期居中扼要昨諭該大臣會同會國藩妥爲籌議著俟擬定後候旨遵行其上海應辦事件薛煥仍當隨時籌辦毋稍推諉將此由五百里諭令知之○諭都興阿實覈沿江釐稅○以守城潛逃奪雲南總兵官申有謀職○予安徽陣亡副將吳秀河南陣亡參將楊拾珊祭葬世職貴州陣亡道員楊夢巖祭葬世職建祠○是月蠲緩江蘇銅山等四縣被擾新舊額賦雜課蠲免江西義甯等二十八州縣被擾節年額賦蘆課